

李文忠公朋僚函稿

李文忠公朋僚函稿篇目

桐城吳汝綸編輯

卷第二十二

三月一日復丁稚璜制軍

光緒六年

三月三日復三四兩弟

光緒六年

三月四日致曾劼剛星使

光緒六年

三月十七日復周福陔中丞

光緒六年

復曾劼剛星使

三月十八日復譚文卿中丞

光緒六年

三月二十日復黎召民京卿

光緒六年

四月二日復陳荔秋星使

光緒六年

四月三日復周福陔中丞

光緒六年

四月五日復勅剛星使

光緒六年

四月十七日復李丹崖星使

光緒六年

五月三日復何筱宋制軍

光緒六年

六月五日復吳清卿節帥

光緒六年

六月七日復李丹崖星使

光緒六年

六月十一日復丁稚璜宮保

光緒六年

七月十六日復劉峴莊制軍

光緒六年

七月二十一日復船政黎召民

光緒六年

八月六日復張幼樵侍講

光緒六年

八月十七日復李丹崖星使

光緒六年

八月二十六日復劉峴莊制軍

光緒六年

八月二十八日復周福陔中丞

光緒六年

九月二日復張幼樵侍講

光緒六年

九月十八日復劉省三軍門

光緒六年

九月二十二日復孫侍郎

光緒六年

十一月二日復李丹崖星使

光緒六年

復黎召民廉訪

十一月五日復丁稚璜宮保

光緒六年

十一月十一日復周福陔中丞

光緒六年

十一月十九日復張幼樵侍講

光緒六年

十二月六日復黎召民廉訪

光緒六年

十二月十四日復周福陔中丞

光緒六年

十二月二十二日復王壬秋山長

光緒六年

李文忠公朋僚函稿卷第二十二篇目終

李文忠公朋僚函稿卷第二十二

桐城吳汝綸編輯

三月一日復丁稚璜制軍

手示於伊犁悔約一事自告奮勇願往俄都折衝尊俎騰出閒隙布置東北沿海之防袞袞諸公若皆如我公心事光明何至杌隉如此傾倒佩服莫可名言使俄早 派定曾劄剛恐難更易惟此舉殊欠斟酌地山以頭品京秩頭等公使之議旋即翻變劄剛名位視地翁相去遠甚地山銜朝命而出尙不可靠劄剛則由海外移俄知其未曾面 聖親授機宜又俄英猜嫌已深劄剛與英人交密俄必疑其與英勾串更格格不入有此數節可謂畫蛇添足恐於 國事無益有損耳萬國公法即兩國失和無陵辱使臣之例但不接待不與議事辱 國已甚一誤再誤其可追耶左帥主戰倡率一班書生腐官大言高論不顧 國家之安危即其西路調

度不過爾爾把握何在將來俄人不必遽動大兵止令所屬哈薩克布魯特安集延及白彥虎之衆入境肆擾數十萬人可一呼而至左公卽首尾不能自顧可爲懸心又況東北萬里無人無餉無兵如何措手沿海防務弟不敢不竭力籌辦昨與總署商定屬李丹崖在英定購鐵甲船二隻需價二百萬以外京外合湊已得百餘萬明年船到再陸續挪付以後選將練兵事理甚繁經費尤窘焦灼曷任俄事至此已無結局直累到四海困窮內變浸作而外侮愈不支矣天下本無事庸人自擾之奈之何哉俄現未聞動靜似其蓄謀叵測不在旦夕之間 中朝向來積習遇事若無事然有事則又倉皇失措也執事請纓不行計惟悉索敝賦以供四方之徵調然民力竭矣何時可以休養念之愀然

三月三日復三四兩弟

接二月十八日來書知家廟修改一節大兄五弟與弟等意見不甚相同

屬兄將家廟支祠名目議定再函告伯兄酌辦當日兄與四弟商建家廟原因先光祿墓側既有隙地及早經營一以妥享先人神靈一便吾兄弟日後祭掃廬居其時兄尙未定有興築李樓之議意卽以此間房爲歸田棲息所也四弟倉卒興工又未遑考究品官家廟定式正殿三間本太簡陋一成不易未嘗不私疚於心去冬三弟來信以房屋現多傾圯亟謀修理兄聞之深爲焦念緘請伯兄主裁藉此議修或照風水家言拆移西宅擴開中殿爲一勞永逸之計伯兄謂須詢謀僉同而後動工固是穩著乃諸兄議論分歧各執一是兄相隔太遠既率忽於前遂不敢固執於後屢函致伯兄俟弟等如何定議卽便興辦兄卽不過問茲閱伯兄二月十三信與弟等來函籌慮再三姑卽鄙意分晰陳之並鈔寄伯兄閱核

一弟等函云若作爲光祿公支祠正中一宅三間亦無不可若改五間照吾學錄禮制日後宗子遞入遞遷支子祇准隨祭而無入祀明文必啓子

孫世世爭端兄按吾學錄云通禮家祭以官之大小分祭之隆殺不問其爲宗子與否是已闢去宗子主祭之說至宗子遞入遞遷不准支子入祀更無明文鄙意禮順人情緣情定制本可變通吾兄弟忝躋極品先光祿功德崇隆專爲立廟正殿不可不遵禮制改建五間免爲識者訾議中三間爲堂似可仿照祠堂辦法每間各一大龕中龕供高曾祖禰考妣四代神位左右間吾兄弟可依次入祀揆諸先光祿在天之靈祖孫父子歡聚一堂當甚願也以後子孫不准再入亦不必祧遷廟以光祿公爲主上推三世下及諸子似天理人情之至支祠名目不經亦無支祠必應三間之說家廟匾懸挂多年尤不應改大兄五弟欲拆去西宅自爲形家所惑又嫌餘房太多省卻後累皆有遠慮弟等擬將後添西巷拆去讓出丈餘地基已踰會典品官塋墓尺丈且廟成十數年來家運日隆無甚壞事似仍舊爲是亦甚近理古者左廟右寢故廟必立於居室之東今若拆西宅留

東宅則廟在宅西又與古制不合似應照四弟勿拆西宅爲妥但若改建正殿五間或將東西宅各拆去一二間庶殿基加深寬大堅固經久此外餘房不甚合式均不必計是在諸兄弟相度酌辦公產房屋太多後人修守費力極爲正論惟自告成旋即拆毀亦非所宜子孫不肖住屋不保卽家祠亦未必永守我等及身勉修各捐資存公善後盡心而已國無千年不失家亦豈能百年不敗哉

一四弟自願包修大兄自願捐錢儘可照辦幸勿彼此推諉將要件擱下至修成後應如何妥議章程捐存公項聽兄弟互商定局應派我一分一弟等函稱各房興造住宅糜費無數凡事將就卽可可惜福洵見道之言自今以後私宅營造必須停止祠宇大事卽士庶家亦所當先各宅華麗竊謂太過家廟過簡非禮貽譏未免輕重倒置望三思之弟等如以鄙意爲然希鈔寄五弟閱之

三月四日致曾劄剛星使

自使俄信至尙未聞布置若何極深懸系總署擬請薦賢暫代英法使事似爲預留退步想參贊陳劉二君可勝此任否松生留英則瀛眷可不偕往苦寒之地進退尤爲裕如尊論廢約則暫不能收回伊犁伊犁之病以暫不施治爲是洵屬中肯又稱與俄決裂不至大有傷害俄人內懼民亂外防英侵未敢更與吾華大開邊衅料敵亦甚明透至謂英人斷不許俄人得志於華是否確有見地俄若得志於華首在新疆次則黑龍江吉林皆非英人力所能及之處有妨於英則英或中梗無損於英則英商且從旁設法牟利豈真能輸誠助力於吾華哉俄將軍高福滿節制西路各回部最喜用武上年地山議約時俄君調回與謀伊欲與左公決戰不願送還伊犁其君相因貪通商分界各便宜破衆論而許之今廢此約正合高福滿之意蓋與我軍擊柝相聞又因細故生衅恐其陰賊所屬哈薩克布

魯特安集延部衆及白彥虎叛黨時相侵擾金和甫張朗齋所部各萬人
饑疲已甚僅劉毅齋勉奮弩末首尾不能兼顧設有蹉跌再失數城全局
卽虞震動左公衰髦好爲大言究其軍實餉精素爲俄人所蔑視黑吉兩
省旣乏將帥更乏勁兵巨餉斷難與俄抵敵也朝野上下僉盼我公以三
寸舌折衝樽俎之間竊聞地山以頭等公使甫抵俄時俄廷方詢以說話
辦事能算得否磨折旬餘而後得見今執事居二等之班當舉朝鼎沸之
後若僅接見而不與議事其奈之何況俄英猜忌甚深知從英都移來彼
更多一防備其言亦無自入想成竹在胸必有應變不窮之法企念良殷
萬一俄肯與再議約能將伊犁南邊帖克斯川讓與我彼此界限盡齊新疆
各城通商照陸路舊章減輕克稅則不許免漢中西安止准一路行走除
此數大弊餘仍一一照行未知能辦成否總之彼已到口之食復令吐出
是大難事竊慮其蓄意用兵必照原約而後已或更變本加厲耳巴西不

日可到通商和好之約自應准立招工斷不能允前商延英水師兵官亦祇請其教練非用作戰將西洋公例固熟聞之中國輪船兵法全未入門故不得不藉英人爲先路之導招致既如此爲難尙祈徐爲留意尊麾業將遠役遑恤其私令愛伴送乏人似應緩議

三月十七日復周福陔中丞

前奉正月二十一日 密諭以奉天營口烟臺海防責成敝處統籌兼顧呼應較靈等因昨因兵船尙未購齊據實覆陳請 旨暫緩責成蓋不敢驚兼顧之虛名也惟奉天已調宋祝三所部前往分紮各海口營口尙不甚空虛煙臺僅槍隊一營實太單薄輪船艇船皆不可恃尊意騰出防河七營調省操練預爲海防緩急之備似宜及時認真選將整練稍有就緒卽撥三五營赴煙臺登州擇要扼紮以壯聲勢頃接滬報俄國新派水師提督調東海兵船十二隻來華未知其意何向虛聲恫喝亦須防患未然

也東省礦產最多必應破除成見設法試辦喬野觀察來書謂執事擬集資合作期於有成深爲欣佩適馬中書建常到此留意淄川鉛礦濰縣煤礦弟令招股議有規模再資函往謁稟商一切喬野素知馬君當能道其詳也

三月十七日復曾劄剛星使

奉手示鈔函已接譯署電報知有使俄之行所陳難處兩端燭照數計洞澈先幾曷任欽佩鄙函前已詳及聞總署會同王大臣議覆將崇公原定條約逐節駁斥請旨交尊處照辦俄若肯與議約駁改太多斷難就緒或不與議或勉強與議而仍無成似未便匆遽告歸致敗和局識者多以蘇子卿執節不屈望公而鄙人深知尊體畏寒不宜朔漠恐亦愛莫能助如何如何政府畏清議實甚明知其難又不能不爲細駁仍由執事密察事勢通籌利害或摘商數大端與俄廷辨難其小小節目則奏咨諄請通

融俾有結局是亦了事之一法卽此次使俄爲第一難事我公生平磨難險阻亦以此爲第一難處之境置身家於度外斯無入不自得乞無過慮蒞俄後望將致總署函隨時鈔閱俾釋懸懸赫德果已議及郎副將事沅丈請開缺 優詔慰留行當大任鄙狀輒平

三月十八日復譚文卿中丞

奉二月二十四日手書猥以畿甸偏災重勞盡畫先挪解晉賑捐款五千並飭司集官紳籌勸悉索敝賦之餘尙蒙登高而呼源源解濟仁聲義問遠近觀感豈獨三輔吏民頂祝大德已也昨復蒙 天恩賞撥漕糧十萬石益以浙蘇粵淮各處捐助工賑次第並施予黎欣欣然有生意但願從此歲豐人和得以專力籌備外侮亦幸事矣台旆往勘各海口礮臺水師防務必更周密前擬訂之蚊子船如因費絀罷議或俟粵局製有成效再行仿辦以期節省前剛四五月間可由英赴俄來函亦欲不稍遷就但慮

彼不與議或姑議而無成終無退步其眷屬似須留英又仍兼英法事固未能勉效蘇武耳

三月二十日復黎召民京卿

船局經費日絀自非節無用以求有用不能起色停修停造舊式之船豈意籌造新式快船少可勝多曷任翹盼魏瀚陳兆翔等在洋學成總監工據稱仿造快船確有把握望留意獎拔裁成俾盡其所長爲幸此間逐漸購置新船管駕頭目暫取資於閩廠既慮人才有限而水手等亦募南人尤恐人地不習故擬仿設水師練船學堂爲造就之基勸辦伊始師徒均少丹崖星使迭函嚴宗光堪充教習閩人多引重之夏間學生出洋後允飭赴津感盼之至閩廠練船及衍學堂章程乞先飭承鈔錄一分速寄以便參酌舉辦爲幸丹崖以議購鐵甲船請由閩選派管駕管輪舵水等六十人赴英隨船歷練幫駛回華兄離廠議具奏亦慮管駕難得其人曾絃

商丹崖如鐵甲有成議卽令在洋期滿學生內擇尤作爲副管駕仍選募洋員管帶以專責成惟管輪舵水等須由閩酌派前往沿途練習則該船到華後可期運掉自如昨接丹崖三月初電報鐵甲價須趲付英允售尙在未定等語若一定議卽須兌價交割派人往英查頭批駕駛學生於三月底期滿截止薪糧或由尊處趕發電報屬丹崖酌留稍緩起程回華俟鐵甲購成便有現成人可供驅遣也劉步蟾林泰曾皆曾在鐵甲船學習而劉尤勝將來奧利恩船到後擬令劉步蟾管駕否則明春赫德所購碰快船二隻到時卽派劉林二員分帶目前蚊船乏人接替似未便遽令遠去耳黃浦船塢可修鐵甲鄙人亦聞之熟矣俟振軒制軍履新當愆愆其妥爲經理粵匠工巧價廉甲於他省得人振興所造殆未可量西學必應就地開設祈執事隨時緘勸當事及時提倡吉林松花江與俄接界 旨令創設船廠鄙意欲疏薦溫道子紹酌帶粵匠往彼察辦未知遷地能爲

良否如溫道不克分身閩廠有可獨當一面之人帶匠工機器前去否松花江雖不甚寬上通黑龍江下達東海實要地也兩生足疾究竟何如上年會辦南洋未就 廷議頗不謂然昨來信不願督辦粵釐果卽出山無論何事必有裨於大局尊恙旣漸痊復幸加調攝幹濟時艱正不獨船工一役借重長才也

四月二日復陳荔秋星使

容元甫來謁言學徒拋荒中學係屬實情由於純甫意見偏執不欲生徒多習中學卽夏令學館放假後正可溫習純甫獨不謂然弟擬致函純甫屬勿固執已見尙祈執事便中勸勉令其不必多管應由子登太史設法整頓以一事權庶他日該童等學成回華尙有可以驅遣之處無負出洋學習初意也小呂宋凌虐華民弟前據招商局轉稟公呈咨商總署核辦嗣准咨臧請會商閩省將軍督撫辦理並令揆度機宜酌定一切弟思閩

帥於境外洋務向不關心且亦無法可設執事既爲日國星使小呂宋亦日之轄境或將華民公呈商彼外部准設領事再咨照閩省及南北洋就近選派何如容再專文奉商

四月三日復周福陔中丞

英銀磅價隨時低昂本無一定大約規平每磅合四兩內外關平則照市申算赫德原函及向來辦法每隻蚊船十五萬乃約數也事竣冊報方見準數此船造成同華約須一年半爲期運費保險並計恐尙須找補若干屆時再據文報轉達未便預定確數耳蚊船機器過精非由學堂出身之武弁不能管帶敝處前購八隻皆由閩廠調人分管猶慮疲懈不甚得力近仍添募英兵官教練而以中國曾經戰陣之將會統庶緩急稍有可恃蔡鎮久帶內江戰船甚有膽勇而於機器洋學實未入門將來似仍選學生管帶洋弁教習而令蔡鎮統率巡防就地擇才尙無踰於該鎮者但該

鎮前在閩臺幼帥遽令統帶輪船月薪數百金志願頗奢此來示稍涉浮誇之語有自來也究其人尙樸勇僕所素知聞登鎮苦不可耐磨磋兩年俟蚊船到後有人管帶議月給二百金令其以本鎮兼統照料海防或不致散而無紀且亦登鎮分內應有之責成卓見以爲何如

四月五日復曾劄剛星使

新聞紙云俄都議崇公定約如不照行不能接見公使與西報電音約章已定絲毫不肯更改之說大致相同昨接總署函稱月前邵小村電報俄人知曾使俄詞色尙無甚難聞崇治罪其君因賞布策頭等寶星譯音與崇而屬駐華各使代崇乞免謂定約又改崇復得罪恐新使蹈故轍須先立據云云總署頗喜其尙無決裂之地未知小村所言果可信否尊處亦接其電函否若先立據要立何等字據卓見臨幾應變必有辦法正月間駐京公使公函總署代崇乞免兄亦密緘總署謂崇不宜重罪致激俄怒其

時 聖意及廷臣皆欲正法賴政府援中外衆論與醇邸密請從輕乃以
斬監候定讞在中國自謂寬貸而外人猶有煩言尊處電函一再申請正
合 樞廷微旨不致召謗卽召謗亦不恤也總署與王大臣議駁條約太
多聞已奉 旨行知尊處妥辦四五月之交可以遞到總署函稱但據理
懸擬亦祇可備辨論之資臨時仍恃善爲變通等語是明知其萬做不到
姑爲此論以謝清議而免衆責耳地山在俄時雖事事均經電商惟分界
一節總署電復斷不可行彼已面允俄人無可挽回遂貿然定議此其性
急大錯處執事決不至此惟 廷議堅執如此俄人強很如彼誠如尊論
卽再遣使者數輩亦必無濟徒助波瀾添痕迹而已請無約小國評斷之
說總署計必不行目下 禧聖肝疾未愈月餘不能臨朝 安聖敷衍其
事不甚作主沈相因保薦崇公使俄致叢衆謗悞惱成疾已請假一月樞
府祇高陽秉筆洋務甚爲隔膜時局亦大可虞昨筠老在籍具疏交敝處

代遞內有六條大意言西約當由左相與俄人議辦伊犁應暫不收回崇公不可重譴致違公法英法使臣不宜使俄致觸俄忌廷臣主戰不宜聽從侃侃而談深中情勢惜到京已遲已成之議無可挽救此老若復召充總署能見其大必於國事有裨無如政府景李王諸公皆與不合清流又紛紛譏謗是以薦賢數十人無論列及之者辦事人少解事人亦少可慨也台旃何時起程瀛眷是否留英均深系念都中人來謂栗誠場後氣體大愈慰甚

四月十七日復李丹崖星使

英海部八角臺二船果肯售否想定議後必有電報何筱帥已籌湊六十萬兩解交滬道候撥柏爾來一船如先成交卽飭芝田匯寄倫敦其有不足各處湊墊可先得一百十萬兩連回華運費計已敷用奧利恩一船僅須一年交付定合同之日應匯寄若干隨後分批籌兌則氣力較紓鄙人

必勉爲之如果英部換人客不出售鄙意擬照新式在英廠訂造二隻應以何廠何式爲宜約幾年造成價分幾次勻付乞與仲虎迅速妥籌酌定計現有款項外分年分月應付更易籌辦召民既請留學生在洋無論購船造船不患無位置學習之處敬祈悉心酌度妥辦仍隨時電示爲幸聞帥 奏派劉步蟾帶閩廠頭目水手數十人出洋幫駕鐵甲俟接尊處定議之信卽令劉步蟾交卸領北蚊船赴閩選派惟既雇英弁用英旗則劉步蟾祇能幫駕卽頭目水手等亦不能多用華人究應酌帶若干人亦須核定電報敵處及閩廠遵辦與洋弁立合同時可說明到華留用多少久暫屆時再議此事金登幹辦法已有舊章望查照酌量妥訂快船不宜過重之礙言人人同赫德當與英廠商改也

五月三日復何筱宋制軍

前奉三月二十日手書因購辦鐵甲一事未接李丹崖電復裁答久稽昨

得來電以英海部換人不肯出售蓋聞中俄構衅恐啓俄人之疑耳尊處湊集各款大費籌畫業蒙匯解規平銀六十萬至滬令滬道妥存候撥丹崖前函本謂購現成之船以救急不若取新式之廠以仿造弟亦緘覆英鐵甲如不欲售卽設法定造二隻擬再電催照辦而需款雖鉅陸續籌兌氣力轉較紓展出使存項除提撥南洋購船四十萬外恐不足再墊二十萬之數執事旣 奏准有案將來陸續借撥定造或可勉供頭批出洋學生留洋者照料造船兼資練習劉步蟾自可緩行矣英法各使欲爲調停俄事必須先減崇罪未知 廷議果俯允否

六月五日復吳清卿節帥

駢征就道順抵古城與鼎帥和衷共濟所謂二人同心其利斷金保障嚴疆忭慰無似琿春稟報輪船駛入摩闐歲如確係英國兵船尙無他意惟西洋電報俄派前戰勝土耳其之某將軍赴黑龍江吉林帶兵並先脩墊

該處行軍道路又添調兵船鐵甲船多隻往日本海參崴一帶駐泊有窺
犯高麗烟臺之意與來示橫道河俄卡脩路至琿春西南黑頂子之說已
有印證英法各使僉稱俄人豫備與師屬實而尤以吉黑空虛代爲憂慮
諄請赦免崇罪以釋嫌衅 廷議雖暫密允諸使猶以未能大發渙號爲
疑未知此後情形若何耳琿春防務最關重要新募之師一時未能齊集
執事擬六月中旬前往就地察勘訓練果已成行否郭副將計可抵吉隨
同籌辦該處兵力本單又未經大敵尙希慎重機宜逐漸措注爲幸孝侯
精選將弁親兵人地不習未宜多帶晤時當告知匆促似難齊備新營民
勇西丹似可兼用但不必旗員分帶客隊統領營官薪水外似應酌加公
費夫價曾文正創立湘軍營制重加營官薪銀極有深意欲杜剋扣必先
贈其私也呿嗜土得槍價少遲劃還亦可以蘆餉劃扣候來文飭遵緝庭
偕汪維城早經啓行振軒函稱溫子紹未能卽往峴莊亦謂其非締創艱

難之手昨已緘商鼎翁矣竹報已交遞通譯東南海沿海一帶有無動靜隨時查探飛示

六月七日復李丹崖星使

五月初接電信英鐵甲因新海部不肯售應否擇善訂造等因昨已專摺馳奏奉 旨著照所議查照新式在英廠訂造鐵甲二隻迅卽知照李鳳苞速行定議早日造成不可耽延時日應以何廠何式爲宜尤當悉心酌度認真經理以期適用無爲洋人所給虛糜鉅款等因欽此 聖訓煌煌允宜恪遵認真籌辦業經鈔摺恭錄 諭旨咨照在案本日由滬發電信云現奏明照新式在英廠訂造合用鐵甲二隻望與徐親往安立合同分起匯價早成爲要礮用克鹿卜較好如續訂再信知四十七字想可早日接收趕籌訂辦中國洋面宜用何等新式鐵甲似須較土國八角臺式尤精執事與仲虎探討已久定有成竹在胸兩隻或皆在英廠或分選法廠

如何造法責成在公一人弟毫不造制也仲虎應否酌帶學生駐廠監工
新造船價能否較柏奧兩船經費節省分起匯價隨時電示滬市磅價上
半年較賤能於磅價落時兌付尤省大約頭二批價銀現成三批須豫爲
挪湊尤望於定議後迅速詳細告知鄙見英國前門大礮不及克鹿卜後
膛礮精堅及遠故宜專用彼礮南北各局仿造彈子較易或謂洋廠造船
愈多需費愈廉兩船本不敷分布是以奏請併造四隻乃指撥兩淮商捐
百萬部議准否尙未可必招商局拔還各省官款亦須臘正方有三十餘
萬竊恐造費難遽應手未敢卽行電屬俟有定局當再馳布水雷艇約估
二十五萬四千佛郎已親往察看核實定立合同否毛瑟槍急待需用計
可次第驗收起運焦盼莫名德弁漢納根面稱德國兵部存有特來思舊
後門槍四十萬枝雖較毛瑟分量稍重曾爲德兵制勝之用每桿連子壹
百約僅需銀貳兩數錢在中土已屬難得前令漢納根函請其父漢提督

赴柏林查詢如果價僅二三兩擬訂購二三萬枝其價卽由電報滙交尊處轉付並同漢提督妥細驗挑起運爲要劄剛已否起程赴俄未得確報英法使爲崇公乞免罪以釋俄人疑衅昨奉 旨暫免斬監候罪仍行監禁俟會抵俄辦理如何情形再 降諭旨外人更滋疑慮未卜將來結局六月十一日復丁稚璜宮保

俄事經英法公使傳其國主之命出爲調停謂崇辦死罪由與俄訂約是辱俄也俄故於伊犁黑吉兩路添重兵調鐵甲及兵船十數隻來華卽有藉端開衅之勢請先赦崇以示不肯失和之據再議改約經弟轉達總署請 旨交 廷議准暫免斬監候之罪仍行監禁俟會到俄後辦理若何情形再明降等因蓋恐兩國之給已也英法接電音後以明係藉崇挾制俄人轉激其怒俄又怪西郵紛紛進兵疑 中朝之必出於戰邵小村署使復據情電詢似陰疑於陽之象俄固早有准備矣劄剛六月初由英法

赴俄計已抵境未知接待後肯與商議否微聞俄人負強不改前約或另
派新使來京脅逼亦意中事尊論此時事機全局悉注敝處棉力斷不能
兼顧東北全局然拱衛畿輔責有專歸餉絀兵單不知所以爲計俄意偏
注北洋及吉林黑龍江仍效英法故智窺伺京城若各國調停不下必有
大受窘迫之一日聞公預籌每年三十萬備勤王之用大哉言乎非尋常
俗吏膜視國事者所能望其項背 批諭且作緩議待其時然後行弟仰
體急公憂國之誠亦必待需用喫緊時乃敢奏請惟有心感而已應撥淮
餉蒙飭提前趕辦以應要需鹽務日見順手可勝欣佩春霆由京過談於
奏對及闕恭邸盛稱執事治蜀之廉公有威僉謂蜀人有此公論前事不
辨自明矣四世兄南宮高捷與舍姪經世同門兩家又添一文字因緣可
喜可賀世兄暫緩 廷試大器晚成拭目俟之再俄若虛警無需添兵現
奏明在洋訂造鐵甲四隻爲日後自強張本所請撥淮商捐款百萬卽部

議准仍不敷四五十萬未知尊處籌備之三十萬能抵用否擬俟丹崖在英議定合同分起匯價如屆時籌湊不足當卽奏撥計期應在明年春夏之交中俄交涉大局可定弟必審慎持重以圖之

七月十六日復劉峴莊制軍

勅侯二十九電報云俄外部以未商改約之先罪使籌兵從古所無非先釋崇不能議事是以初七奉 諭卽行開釋迨電覆至俄又不知有無變態前 廷議不欲假英法以賞罰之權誠是也今俄有挾而求又徇所請而 明發諭旨且以布告天下何如事前早辦 恩出自上之爲得體聞寶竹坡先日攻訐政府張香濤陳伯潛諸君相繼劾詆勅侯語侵樞府十四遂奉 旨將執政交部議處槍法之亂可知蓋爲難者不獨輿生也勅剛雖有定讞無如條約經 廷臣駁改太多 旨令照辦恐一開談而俄知不能就緒必另遣使來華以兵要挾屆時似非張蘇口辯所可了事或

有仍令地山往俄再議之說 內意頗動此事但冀在俄議結爲妙惟非我國所能爲政耳俄兵船在東海者有增無減殊爲叵測防務自不可鬆沅霆兩帥添兵二萬畿輔藩衛爲之一壯幸而無事將來或有移鎮吉林者上海爲各國商貨萃集之區斷無擾動則道庫棧局亦可不另設防江防力扼江陰焦山等隘當無意外之虞聞司局運庫積有存款倉卒添募祇要後門槍精練得法可爲游擊勁旅若鎗械不精有兵與無兵等想執事亦必慎重出之敝處既添曾鮑兩路棉力差能自固津沽或無須吳唐北來 西聖病體漸復眠食均康祇望外症不緊當易痊可

七月二十一日復船政黎召民

嚴宗光頃已至津蒙預支薪水三月並給治裝路費謝謝此間起造學堂日久尙未就緒賴春帆駐局督辦明春當可竣工嚴生已飭赴局差委其薪貲卽從十月接支也稔知尊處裁汰員紳而許孝廉苦求轉薦殊不近

情荷留襄辦筆札自送脩金益爲歎仄總署久營船政多弊由於船多舊式爲外人所輕日意格罪不容追而管駕自用大副以下各人役未免濫薦徇私則當事亦不能辭咎薪糧過優者酌量裁減將裁出之款另練水手極是正辦鴻章近與西國兵官討論各國多募漁戶壯丁赴練船學習水手其管駕大二副及機器弁目則在學堂練習弁與兵稍有區別是以西洋水手不能升作官弁也尊論水手另設學堂是否別有所本若以練船爲水手學堂似更妥便水手先要習慣風濤桅篷各事則在船練習爲宜中國歲添新船多由閩廠選募船政似須有兩三隻水手練船方可源源濟用必須考取分等記名始准各管駕挑選錄用庶弊端漸絕敝處先後所購蚊船八隻水手皆係閩人洋弁謂至今尙多濫竽者現亦擬另設水手練船就地儲材不得不爾製造學生由洋歸者如暫難創造快船望遣令隨二批出洋函致丹崖星使令其分往監造現訂鐵甲船俟船成隨

船回華兩有裨益尊意以爲何如春帆前已有暫停一半年積成巨款再造新式之議旋因病退中止似止有如此辦法各國皆以多造快船爲急務頃美水師總兵自長崎過津密談以俄國新調十五船內祇鐵甲二隻其餘十三皆係快船較鐵甲尤得力我等欲振興水師必當致力於快船其笨木船固略可敷用矣二批學生何時可起程出洋筱帥恐不暇經營望臺端設法籌催或謂日意格薪俸太重出洋學生羅豐祿陳季同等皆可隨星使照料無須日曾乞酌之劄剛至俄請追崇罪似有轉機而兵船猶有來者殊叵測也

八月六日復張幼樵侍講

鄙人論事惟求實求是聽者不察或以爲過激究之明理克己二語兢兢夙夜未敢或違辱來教祇增愧耳訂購鐵甲丹崖日久尙無回信所籌各款既未足數亦難應手北洋果有鐵艦四隻輔以快船水雷艇十餘隻以

大連灣旅順口等要隘爲駐扼之所相機出入攔截敵船必多狼顧不敢
逕入遼海此上策也然海口之礮臺內地之陸軍仍不可偏廢若不能禦
之於海尙可鏖戰於內尊論前敵一摧全軍潰散敵甫登陸我已無兵可
戰者自指庚申前事而言稍知兵者斷無如此布置之理目下津防以零
營分扼礮臺留銘盛兩軍爲後路援剿游擊與尊指略同彼勇我智彼整
我散用兵本不主故常惟軍實以簡器爲先中外人人談兵皆不知有兵
而無器與無兵同自明以前尙所徒手搏戰者今則非其時非其敵矣臨
事號召數萬恐不敵數千可勝慨哉俄事未必卽戰竊謂所以籌戰備者
多采虛名毫無實濟亦幸而不戰戰則優絀立見後悔其奚追耶便道過
我一談爲盼

八月十七日復李丹崖星使

連奉手書佞僂久未泐復茲謹條列如左

一鐵甲船式執事與仲虎考核既精如四十號函內之妙用九項最妥喫水二十尺與十九尺無甚參差德國拜晏等船式樣甚新自應忝酌向英法各廠訂購勸剛搖惑之言斷不可信此與俄事決無妨礙閣下係奏明責成辦妥更無可以旁談之人仲虎謂有不便四端極是幸堅持定見毅然任之閩價六十萬久匯存滬勿令我輩食言爲要駕駛之人尊論劉步蟾蔣超英可翼勝任輔以洋弁教習當可愈練愈精若不及時籌辦是自行阻誤咎不在人也但日意格既隨赴俄恐尊處無熟手商榷或恐有受人蒙蔽之處希加意研究期於必成弟前奏訂辦四船今因款項未能遽齊先辦二隻必可應手中間厚甲首尾無甲者既稱最爲合用應請卽照新式酌購勿庸疑慮

一懷脫臺魚雷及法廠雷艇價均早匯去刷治考甫創造燐銅壳閱試如較懷脫價廉物精應請酌定日監督既未能偕赴奧廠面訂必須酌派槍

礮生及藝徒往習並令仲虎隨時督查詳探祕要庶他日仿照造用不患
有器無人

一所訂之毛瑟槍九十月能否解到幾於望眼欲穿軍情緊急而訂購之
項多不應時前漢納根請購特來思槍亦爲救急起見旋奉電示卽屬停
止具劄關顧至廣東採購前膛短礮左帥專搜廢槍想皆需用急迫不暇
精求敝處雖不肯濫收廢物然精者總未到手更何能奏停他處耶

一肄業續派出洋尙未據召民函商訪侯謂在英法者應歸使館派員兼
管以專責成固非無見前曾緘屬筱宋奏明由公使照料惟執事情形較
熟亦須會商主持委員文案少派一節可逕與召民商辦

一俄事往不可諫勅侯續電以俄廷另派公使來華議約且其海部尙書
新任提督已由滬赴長崎勢將以兵船要挾 廷旨雖責令勅侯在俄議
辦阻使勿來恐無妥結之法萬一定議亦斷難如人意所欲出尊論甚有

卓識存備采擇

八月二十六日復劉峴莊制軍

張廉卿素行耿介或因居客卿之位未先脩謁然其樸學爲古文詞已爲今之第一流執事宏獎後進自不可無以調其乏也春霆特召督師爲整軍經武遠圖已奉旨准募萬三千八百人非我輩所能遙制政府自俄事起後謠詠紛乘習爲模稜此必有從旁主其議者司農及近畿受累所不暇顧矣勅侯在俄議約齟齬彼先派海部黑沙土幾來華統率師船又令布策赴京會議顯欲以兵脅制情殊叵測海部於秋節前抵烟臺日來尙無動靜聞埃布使到後偕同入都昨接勅剛十七日電信似布策尙未起程未知有轉機否其兵船大隊圍集吉林海濱之摩闊崴聲稱攻奪琿春或謂先圖高麗海口各國慙息趁此兵威占取朝鮮而高麗通商之說經弟函勸仍前固執奈何二十一日廷臣又會議俄事和戰二策迄

無定論左相 內召閣將刻期入 覲老成謀國或另有卻敵制勝奇計
耶澳門立約未換一時似難議辦自津至滬電線擬明春開工俟有成局
金陵至鎮尊處似應添設分線一條則南北通信更速矣

八月二十八日復周福陔中丞

俄事之壞自去臘寶張諸君慷慨陳言而起直至今日節節貽誤仍日進
議論其源自左相發之亦實由政府導之而自貽伊戚也勅剛迭次電報
俄因張奏傳鈔乃派兵船來華迫免崇罪結積案而其海部尙書已起程
過滬矣勅欲與議改條約則云此不能在俄定議又遣使布策於八月八
日起程政府畏其來也風波不測因寶張之請商調左相入都謂可以主
戰嚇俄豈知俄人藐視太沖已久其調往運春兵船二十五號陸隊萬人
豫備煤糧藥彈百物俱備大有乘機及時規取遼左之勢若布策與左公
相遇則立形決裂耳清議之禍與明季如出一轍果孰爲之耶至於我輩

受其訾警更無足怪上海定購林明敦槍三千桿克虜卜礮六尊均係佳品嚴飭各營認真操練儘可制勝硝強水一項津局如有存者咨取時自應借撥將軍嶺礦砂一兩果能得銀一分大妙馬建常願承辦否昨其弟建忠將淄川礦砂寄至法國總局名師分化據云百分得淨鉛八十一分十萬石得淨銀一百四石確有把握弟見其畫押憑單如此何東境之多地寶也適淄川人鄒牧振岳來謁屬鈔此單徧告淄鄉父老勿惑巨紳及縣令阻撓之論未知執事肯力爲主持否滕令蒙准引退感甚東海關加釐無可湊撥正稅更不易解足也

九月二日復張幼樵侍講

勛剛續報俄允召布策暫回凱陽德謂接電報布已起程計下船將抵江海恐難更回蓋其兵船海部作勢甚大費餉甚多不欲空手而反也多聞北河封凍海面並不結冰俄人生長苦寒之地隨處皆可踏冰登岸至瑯

春圖們江西北更易橫衝直突如入無人之境矣自去秋議俄事後鄙人不敢輕言戰伐非爲津沽自全計乃爲大局安危計聽者不察乃嘗敝處獨不言戰豈知各省如與強敵決勝負敝軍雖單或可多支時日與不知兵者談兵無怪是非顛倒耳此事恐非盡許條約不得結局尤慮有條約外之事觀主議者德望風力何如海參崴摩闊崙嚴杵河一帶屯兵已近兩萬仍有兵船續至者彼族僉稱注意攻奪高麗海口內窺奉吉試問何以禦之彼時有不張皇以圖了事者耶沅帥住津旬日形神枯竭兩足痿跛誓不出榆關一步鮑軍新募烏合既無利器又不知用法擾民適足爲累未可獨當一面也津軍礮械藥彈經營數年始供數月戰守與西洋用兵殆非易言持國計者平日不於此等著力而空言浪戰豈非視國事如兒戲耶鎮北四船仍照洋圖測海尙未另繪有人繪呈金州要口圖尙詳確附呈他日鐵甲碰快船到擬扼旅順可以自固

九月十八日復劉省三軍門

凡與外國交涉既揣強弱尤論詘直俄在西國爲最強其與中土沿海沿邊交界三萬餘里更非英美德法可比伊犁乘回亂掠取本不欲歸我舊疆在我則甌脫極遠之地亦可不急索還也中外主國計者忽爾好大喜功再三追索樞廷不謀於衆竟以軟弱無識之人充其選而假以權忽又舉朝狂吠棄廢已定之約理可謂直乎自粵捻平後遣將裁勇而餉源愈竭歲供西軍六七百萬無停止之期臺灣事起乃議海防名爲額撥四百萬每年實解不及百萬北洋僅三四十萬耳無餉則無精兵無利器淮軍協餉亦十去其四上年奉部議飭裁一萬餘人又分防南北兩洋勢可謂強耶庸儒不知時務謂敵處簡器練兵歲費巨款必當主戰而執事來書亦遑其言固由見愛之深亦不考究事實何也左相擁重兵巨餉又當新疆人所不爭之地飾詞欲戰不顧國家全局稍通今古者皆識其

奸僞而來書亦欲鄙人效顰未免有違素志自與足下共事行間隆奏議論昭昭在人耳目未敢作僞今忝躋高位漸屆頽齡更不作此無恥之舉矣且堅持和議則有之竟云不能戰三字則始終未出諸口亦未存此心也足下何從聞斯語毋亦竊窮京官爛名士口頭禪而故相戲弄耳去秋崇約初定總署先奏請 勅下南北洋與左相議覆幼丹先復力駁條約不可行而無辦法兄覆請 朝廷自量數萬里兵力餉力能與俄久持則可始終堅拒否則廢而復允或更加甚焉是時左奏主戰已在途矣 內廷接鄙奏不置一詞又交左復左公謂持論甚爲明通但此事非一二人所能定議請飭 廷臣九卿以下會議此 廷訟之所由起也左公戰是虛詞兄無意一問乃對不出遂請 廷議以掠一時美名不料將弄成實禍也然自 廷議以後兄於俄事未進一言未發一謀而說者遂疑其不能戰專主和朝野上下併爲一談亦未求其實在把柄殊可怪也此等悠

悠泛泛之毀譽何足爲人生重輕而執事乃重視若此豈高才遠識而亦出此耶來書舉漢魏晉宋時事以例今似尙未甚拓眼界但力求自強爲不易之策試問 朝政何者爲自強之實耶其實不強而空作強話則危亡立見東三省至今尙無佈置僅數肉食將軍能了此事否大枝勁旅餉從何出卽新募烏合多亦何益至麾下若肯出山津郡萬餘人誠不足以盡所長慙慙諸將羣起攻之是何言歟吾生平未慙慙攻人人自相攻耳如別開生面獨當一路唐軍非兄所能主銘軍一聽取攜丈夫戰敗則死耳何惜此區區爲其他餉項軍火均不敢承吾始終未忍棄公而來書見棄已久又何言歟數千里外何能事事請教形跡之疏其咎似不盡在鄙人旣蒙責望不敢不盡其愚進止機宜惟公自決

九月二十二日復孫侍郎

接劄剛七月二十二日函稱崇約之不公允西國皆知俄人亦自知之向

使地山之歸吾華不動聲色但言所訂未妥不能允行是西人常有之事何至遂有失和之說祇因舉措慌亂而備戰之說自我發之故至如此棘手病之增劇實由於藥而當時主方之醫猶不減口何耶云云極爲洞中肯綮凡處大事須以平靜出之議戰議和紛紛喧鬧轉使外人得窺朝廷之無主見究竟所謂邊防果皆處處可恃否卽所駁條約亦皆處處允當否鄙意竊料劄剛在俄一月內恐無成議事之變態尙不可知弟自去冬以來久不與謀俄事前因英法使代崇乞罪轉達總署致叢衆謗繼以總署函商俄約偶抒已見屬令電告曾侯又蒙詰問其實鄙言何足爲重輕亦斷不肯強參機事也左相西事交替需時聞須明春到京屆期俄事當有定局 中朝贊襄未必有益而玉門內外善後僅委之劉楊二公徒自擾攘此亦舉措慌亂之一端也

十一月二日復李丹崖星使

所擬鐵甲船式似甚精密約費較省於奧利恩各廠開呈細價計已比較核定旋閱西北各廠有無更改擇訂兩艘或在一廠或在英在德想早酌定有續示在途矣前接電信票匯二十萬磅業由滬道陸續匯寄以後如何分批匯價何人駐廠監工悉聽尊裁再作區畫擊雷艇之小礮聞各國改用虜登飛一寸鋼子新式俄船赴華者皆有之似較格林尤爲擊遠有力何以尊處尙未偵知務望酌辦至將來驗收運送各節若用英旂所慮三難尙未盡確奧利恩兩船擡價未成係伊不肯售非我不願買或不至猜忌刁難外部應由英使備文俟十八箇月船成俄事必已定議勅侯必已回英此係吾華要政勅意當無疑沮英人亦無保局外之權雖非金登幹代辦英亦不能禁華人之不自訂辦既有星使主持祇要船式精而價廉赫德亦不能從旁阻撓續訂碰快船將成弟已派丁提督葛雷孫及林泰曾等帶員弁水手二百餘人赴英驗收升龍旗回華此次如辦理妥洽

嗣後當可預籌照辦尊意擬由商廠造較包運上海礮械另載他船是否
可靠沿途停泊添購煤水及一切意外之需如果先期籌商定妥卽不保
險似無他虞望再妥酌德國士思丁廠造法與英無異未始不可試辦奏
案不妨變通也已運棉藥火藥兵槍槍子皮帶盒驗藥器及德國伏雷各
件現屆封河僅到頭起獵槍二千餘枝及電燈途中遲滯可恨棉藥五十
噸尙非急需儘可陸續購運惟大批毛瑟不能速到令人望眼欲穿留聰
穎藝徒往德廠習魚雷造用之法最爲緊要將來雷艇到時務令藝徒隨
來効用否則有器無人能知用法與無器同船政續批生徒召民尙在挑
選習練未知何時成行第四年展期經費及已墊川資當已匯到劄侯兩
懇留日意格監督薪費似未遽允使法參贊繙譯蓋監督薪費較優也應
否暫行撤局非敝處所能越俎可由執事臧商召民劄侯酌辦論中國洋
面兩鐵甲尙不敷用前奏請分起訂造四船部撥准捐僅四十萬招商局

官款亦分五年提撥難遽集有巨費祇可儘力先訂二船如有餘力或再添辦快礮水雷各船或續訂鐵甲容隨時妥酌商辦

復黎召民廉訪

接丹崖八月間來函以鐵甲船式已酌定限十八箇月告成俟各廠開有細帳詳細比較擇訂兩艘或在一廠或兩廠應否酌派員役駐廠監工再行呈明學生展期已滿所習已全似可遣回暫留聰穎藝徒一名派往德國習魚雷造用之法等語蓋因敝處在德廠訂購魚雷雷艇須人學習以便隨雷來華試用渠既未擬定派幾人赴廠監造又稱學生無須留洋再習其意僅留一人學魚雷似魏陳二生亦可稍緩派往矣粵海關應派南洋經費是否確有可指快船何時可以興工甚爲盼念二批學生約計何時方能出洋務先函告丹崖爲幸敝處現派丁提督葛教習林泰曾鄧世昌等帶大二副水手二百餘名赴英接帶新購礮快船來華各蚊船管帶

大二副等曹部一空轉瞬春融需才甚急望執事豫選數人以備咨調或待劉步蟾稟調亦可威遠濟安各船已飭回閩山東新購蚊船二隻明春可到乞貴廠代籌管駕等接帶

十一月五日復丁稚璜宮保

俄事經曾劾侯在彼議辦復召布使折回初限一月至九月杪已滿續又展限兩月聞其電報云俄允歸還伊犁南境松花江行船西漢通商均可商改惟索償兵費一千二百萬盧布合之地山原許五百萬盧布約須銀千萬兩 內意欲稍減讓未知何如彼意謂商改條約事所常有而罪使調兵舉朝議戰是以東西水陸各路彼亦不得不調兵將以圖抵敵戰雖未成而自我發難應議補償雖係逞強無理之談亦可見去冬迄今攘臂而爭 國是者貽害不小矣各處調防之費既虛糜千萬議款若再增千萬民力如何可支元氣焉得不盡悔可追耶來示謂須加益然後可以成

事明見萬里欽佩曷任弟因俄議未定曾鮑二軍分駐畿東海防未敢解嚴現雖封河仍須駐津坐鎮俄兵船留集琿春海參崴一帶奉吉防務喫重究無可恃之將省三奉 召至京暫乞假回津就醫埃事竣卽回里耳渠奏請創辦清江至京鐵路以便兵商轉運與敵處 奏准添設電線相輔而行洵爲自強要政惟帑項匱竭之餘欲借洋債興辦非常之舉難必有成若得我公量移南洋或能合力籌任也鐵甲船已訂造二隻當可勉力湊付若再添購非仗尊處於鹽務協濟數十萬斷難集事然非至無可設法時不敢遽呼將伯幸垂鑒焉准餉三批仰蒙提前飭撥感甚撫屏留都侍醫爲羣醫所撓據云 西聖誤服他藥 國家大事無一不誤於道謀良可慨也

十一月十一日復周福陔中丞

慶軍之餉慨允分任欽佩奚如峴帥接 寄諭後尙無函牘來商敵處前

准咨鈔覆疏卽經咨行江南暫照舊籌解淮餉以供支放嗣奉會商妥議之旨又經照咨去後所擬東蘇分任之說僅爲執事陳之冀可調停結局若峴帥始終不商詢鄙人似亦未便插訟如果有專函徑商尊處或可就此定議最爲公允弟如續接函牘亦將尊意告知或再會銜覆奏也昨接揚州糧台報稱彼軒瀕行時已將該六營本年九關餉支清並豫借來春米價是此事少遲定案固自無妨高村決口頃據大名鎮道馳稟趕緊購料調集兵夫將串溝十數道堵合接築小堤已於初一日合龍現俟隄東水涸有土可取尅期補築大隄加倍堅厚約估共需十數萬金除先後提用大名庫款四五萬練餉局二萬金外不敷尙鉅勢須求助於仁鄰徐鎮往濟甯嘉祥鉅野一帶查勘漫水無多久旱後且有資以種麥者今合龍迅速元氣無傷轄境振撫之費所省實多且從前東明隄工均由丁稚翁撥款創辦此次補還原堤事同一律擬卽奏請尊處協撥八萬兩如蒙

俞旨務乞迅籌就近解交大名劉道收用俾得無誤事機感禱無既赫
德函報代訂蚊船二隻明春可到其原來管輪礮洋人須每船留用二名
教習各技俟該船華人學熟再遣回國等情敝處前購各蚊船皆係如此
辦理緣船礮機器繁重必須熟手教演其薪貲無多可受節制也至管駕
大二副管輪機人等應仍於閩廠選調昨已緘商黎召民酌辦容再咨催
沽口蚊船弁兵及艇船水手已挑派二百餘人赴英接管新購礮快船回
華實無可再調統帶訓練之員亦甚要緊蔡鎮能否勝任望早留心
十一月十九日復張幼樵侍講

省三回津日趣覆奏鐵路事此乃鄙意所欲言而久未敢言幸於吾黨發
其端聞都人士近日講求洋務者多亦不甚以爲紕繆殆 國運中興之
幾耶惟事體重大非獨棉力不能勝卽省三慨然自任亦恐窮年畢世不
易卒業時政苦文法拘束甚矣 廟堂內外議論人心皆難盡一無真能

主持之權卽斷無通力合作之日以是徘徊審顧未卽屬草少遲姑就事
理略一敷陳耳尊論南北鐵路成招商局利必大減似無足慮商局生意
在各口原不專恃津局且由南而北鐵道須過津門江海客貨仍多由輪
舶達津以就鐵軌也西洋新報謂中俄議約未成又有變局正增杞慮來
示聞改爲伊犁償款加四百萬盧布事出有名尙不過費似可如期妥結
卽布策春融復來度廩小小節目必與譯署成交劫侯久不報知敝處總
署自倭議參差後音信亦少日以坐鎮練兵爲事不復與聞機要耳根卻
甚清靜省三雅不欲度遼 朝命若來恐將藉詞延宕凡主人不知兵之
處客軍決難相容省公英姿伉爽更不耐爲北洋水師提督終當議設宿
將竟無諳習此道之人省三亦尙隔膜卽資其威望其如性不耐官何如
雪老之巡視舢板師船毫不倦勤固自可敬究於大局何裨哉某公怠於
理事長於趨時彼見譯署與兵戶定議正可藉以結驩固寵豈復慮及後

艮將來接收琉球南島責令經畫定可拱手授之他人也筱軒貿然帶所部赴東大爲劉周所窘敝處雖力持暫濟月餉而江左無一語諮商殊令居間者爲難湘陰提師入直興復不淺然謂船政輪舶足敵俄之鐵甲快船又稱俄雖強不若粵捻回之難剿奚翅夢囈

十二月六日復黎召民廉訪

出洋學生鄭清濂等四人丹崖函稱留德監造鐵甲及敝處訂購雷艇魚雷等件分派學習現在德廠定造鐵甲一隻式樣甚新然船礮雜項約合一百四十萬兩較前擬購英廠土耳其舊式鐵甲所增已多加以將來回國運費恐須百五十萬前奏撥鐵甲兩船經費本尙不敷今湊辦一船所解無幾尙未知能續購一船否此間蚊船管駕大副管輪管礮人等挑派出洋後空缺甚多山東添購蚊船二隻明春必到所需管駕大二副管輪礮等亦專候尊處分撥應用前飭劉步嶠查開可用人員指名咨調內多

出洋學成經丹崖保送之員聞在閩尙無緊要職任台端銜鑑高懸定蒙
擇尤薦送感盼曷任劉步嶠船學頗精氣質稍浮迭經面加裁抑冀有成
就承示其不認抱養父母天性殊薄容再留意誠勉之鄧世昌質地樸厚
而帶船運氣不佳頃令出洋歷練一番當有進益閩廠學生大都文秀有
餘威武不足誠如來示似庶常館中人不似武備院中人然帶船學問究
較他處爲優在因材器使隨事陶成而已二批出洋稍緩慎選爲宜粵海
關應撥海防經費不至無著委員提催當有整數俊星東來春交卸亦須
清理本任未了之事俟撥到卽興辦快船甚以爲慰吉林船廠仍要開辦
前屬玉軒轉商由閩廠酌派淺水小輪船尙非難事諒蒙加意選擇矣
十二月十四日復周福陔中丞

工款蒙又飭解二萬正與鄙願相符感佩曷旣吳丞廷斌熟悉機宜辦事
聚實據稱添築埽場月隄年內未能較工尙須開正補完而附近黃莊李

連莊一帶奇險迭出必須及時添做埽壩以禦汎漲仍擬將該三處險工相距七八里外各築遙堤方爲一勞永逸惟需費過鉅無從籌辦直境黃隄喫緊若此與東省利害共之不得不重賴仁鄰之欣助也召民復函允於開河後遴派管駕大二副北來當無誤尊意蚊船二隻無所依輔平時置於無用有事適以資敵洵思患豫防之論欲令與敵處碰快蚊船併泊旅順以成大枝水軍並可兼顧登州洋面一舉兩得欽服莫名蚊船非礮臺不能立足旅順之臺需費十數萬金異日必爲北洋一大屏蔽該處有此一軍扼紮登州烟臺敵當不敢久泊現延英兵官教練紀律甚精似不必爲二船另派統帶吳春帆謂蔡鎮船學尙多隔膜且有嗜好恐尙非其選容再隨時酌奪奉商也昨接總署密函劄剛冬月二十七來電俄約業有成議伊犁允還帖克斯川一帶加償費四百萬盧布連崇許約合五百萬金西漢通商松花口行船刪去已卽畫押奉 旨准行矣少遲當有

寄諭通飭知照後軒所擬換輪船移大礮借水雷三策均可緩議船上礮位過大不合陸軍行隊之用漁人安設水雷豈能深悉奧妙望將鄙意轉致爲荷頃得峴帥多月廿日函稱慶軍六營薪糧尊處旣難應承暫由江南照舊撥解不敢爲出門閉門之事等語並無商請閣下分協之說或者前議又作罷論耶

十二月二十二日復王壬秋山長

闊別十數年想望風采前有蜀士過謁謂執事主講西川與穉公相得重以昏姻正殷馳念適奉多月二十六日手書遠辱明教叙佩曷已筠仙出洋以後於時務更增歷練實能知其所以然惜其所遇不偶而口訥不足以達意文字賈禍致遭擯棄世運爲之也尊論洋務不及鄙人似專就十八條可許言之究非定評鄙意亦非條條皆可許諾但追究前事之誤雖聚六州鐵不能鑄此錯今劫剛在俄爭得伊犁南路帖克斯川刪去西漢

通商廢松花江行船專條償款添盧布四兆連崇約合銀五百萬 內意
深爲嘉許促令定約畫押勘剛亦知無甚關要徇衆議而爲之耳所爭者
於中國並無實濟而彼已稍厭懲鑒士大夫之愚惑 朝廷之無人亦可
歎已近畿增防二軍明係備而不用亦幸而不用然欲除禁撤防非疆吏
所得言南洋各島悉置領事近日談洋務者多爲此論弟前懲慮筠仙於
新嘉坡設領事以爲之倡功效茫然蓋西國政令畫一凡創闢之土無論
何國公使領事絲毫不得分其權而我閩粵人之久居彼境者亦習慣其
約束而不敢相抗至鐵甲輪船游歷各島既不用戰而可習兵洵爲馭遠
要策弟久蓄此志奈鐵甲甫經訂購一艘餘無指款輪船則各省有主之
者 中朝旣不過問旁人更難越俎天下事無一不誤於互相牽掣遂致
一事辦不成良用喟歎處今時勢外須和戎內須變法若守舊不變日以
削弱和一國又增一敵矣自秦政變法而敗亡後世人君遂以守法爲心

傳自商鞅王安石變法而誅絕後世人臣遂以守法取容悅今各國一變再變而蒸蒸日上獨中土以守法爲兢兢卽敗亡滅絕而不悔天耶人耶惡得而知其故耶因公江湖廊廟之憂不遠數千里諄諄開示用敢一發狂言以相質證海內人物蕭然鴻章垂垂已老而公亦非少年蜀游樂甚歲晚興懷何極

李文忠公朋僚函稿第二十二終

李文忠公朋僚函稿篇目

桐城吳汝綸編輯

卷第二十三

正月十二日致左相

光緒七年

復丁稚璜宮保

二月二日致曾沅浦宮保

光緒七年

復黎召民京卿

二月二十一日復張廉卿中翰

光緒七年

致吳伯華觀察

四月二十五日復黎召民京卿

光緒七年

五月三日復左相

光緒七年

五月四日復黎召民京卿

光緒七年

五月二十一日復左相

光緒七年

六月二日復左相

光緒七年

六月四日致丁稚璜宮保

光緒七年

六月五日復李丹崖星使

光緒七年

六月二十日復黎召民京卿

光緒七年

六月二十三日復丁稚璜宮保

光緒七年

六月二十四日致曾劼剛星使

光緒七年

七月十二日復李若農讀學

光緒七年

七月二十二日復丁稚璜宮保

光緒七年

閏月二十五日復左相

光緒七年

閏月二十九日致游子岱觀察

光緒七年

八月七日復左相

光緒七年

八月八日復曾劄剛星使

光緒七年

八月十七日復李丹崖星使

光緒七年

十一月十七日復丁稚璜宮保

光緒七年

十一月二十日復劉峴莊制軍

光緒七年

十一月二十二日致李丹崖星使

光緒七年

十二月十九日復涂朗軒中丞

光緒七年

十二月二十二日復丁稚璜宮保

光緒七年

正月十八日復李丹崖星使

光緒八年

正月二十日復張振軒制軍

光緒八年

正月二十三日復黎召民京卿

光緒八年

正月二十八日復李丹崖欽使

光緒八年

六月三十日復張振軒制軍

光緒八年

七月二日復孫讀學

光緒八年

七月四日復張振軒制軍

光緒八年

七月五日致左相

光緒八年

七月二十六日復吳筱軒軍門

光緒八年

八月三十日復吳清卿節使

光緒八年

九月九日復李丹崖欽使

光緒八年

九月二十八日復黎召民京卿

光緒八年

十二月十六日復周筱棠京兆

光緒八年

十二月十八日復張寶齋署副憲

光緒八年

十二月二十日致左相

光緒八年

十二月二十四日復倪豹岑中丞

光緒八年

李文忠公朋僚函稿卷第二十三篇目終

李文忠公朋僚函稿卷第二十三

桐城吳汝綸編輯

正月十二日致左相

別十餘載每念廓清西域艱難百戰勞苦功高而鴻章謬膺拱衛亦復竭蹶經營應接不暇道途脩阻音問闊疏歉然於懷輒饑彌切頃准大咨欣慰征夙駕漸近畿疆分應負弩恭迎班荆道左藉申契闊商榷機宜惟去冬因俄事未定客軍烽火相望海防難遽解嚴不及回省度歲咫尺有天涯之隔悵慕莫名昨已飭司派員前往沿途照料代達拳拳劬侯臘初來電已與俄外部定議爭回重要數端總署當卽復令照議畫押尊處應與聞其詳矣日本球案議結稍嫌遷就曾以鄙意上陳倭使悻悻回國未卜有無變態沈相忽於除日作古一切乏人贊襄想須埃台旆抵都籌布大略也

復丁稚璜宮保

俄事於臘初接勅侯電信允還伊犁帖克斯川一帶西界照明約喀界不
照崇約塔界在崇約明約之中勘定西漢通商刪去不提松花江專條逕
廢領事設嘉峪關吐魯番兩處交收伊犁另定三條償款添盧布四兆連
崇約合銀五百萬兩奉 旨卽照定約畫押計年底必可竣事俄人本無
戰意尙肯委曲求全勅侯辦事不遺餘力殊於大局有裨不日當有 旨
令沿海客軍酌量減撤矣左相帶隊東行大有滅此朝食之意自因不欲
首倡和議然此事非速和則斷無歸宿數年未通音問昨接其咨鈔陝省
報起程一摺內云過直與鄙人詢商一切適因防海未能在省迎候先作
手書略敘契闊此後僮入直 樞垣總署彼此商議事件甚多固不容稍
有隔膜遠承關念敬以奉聞省三到京知俄議卽定無可位置遂疏陳興
辦鐵路請假來津旋乞續假同籍奉 旨再准一月無庸回籍茲假滿復

申前請未知 內意何如津防淮軍不及二萬各有統將枳棘非鸞鳳所
栖似不樂鬱鬱久居有警則聞命卽來可資禦敵也中國海防非創辦鐵
甲快船數隻不能成軍前購蚊船十一隻分防南北洋祇可作守口水礮
臺之用所訂碰快船二隻稍大今夏可到擬令同蚊船併駐登州對岸之
旅順口以扼北洋咽喉稍作聲勢所訂綱面鐵甲船一隻需銀一百四十
萬明秋工竣來華此船係爲臺灣定辦仍擬續購三號分布南北部撥共
僅三百餘萬如由招商局官本須分三年提用又難咄嗟立致是以未能
放手爲之將來續訂鐵甲如需湊款尊處前擬鹽款能否應手望密示知
屆時酌量奏請感盼曷任船政學生出洋習駕駛三年頗有精通英船訓
練紀律者加以歷練或較老將鼃材差勝弟才力衰弱無能爲役辱承明
公殷勤敦勗不敢不勉尤望中外同心協力助成此舉稍張 國威亦免
有事各處紛調陸軍糜費無用也東明高村潰隄幸卽堵合連善後各項

需二十餘萬東省協濟八萬餘俱由直羅掘黃水滾至隄根壩埽難恃終非久局欲於十里外加築遙隄實苦無此巨款耳 西聖久病淹纏必強諸醫合方入春加重撫屏欲退不能壬秋想仍主講席前書縱談洋務隨意作答中有燕人舉燭之誤幸轉告之

二月二日致曾沅浦宮保

頃奉月朔 寄諭果有總制西郵之 命專圻廿載始晉兼圻在公固述遭勞苦榮觀淡然而 天降大任非公莫屬則早卜之於數載已前不待恪靖入 朝乃贊成斯議也恪靖謂隴上漸臻富庶邊事可任殺齋蕭規曹守從容坐鎮不勞而理況值伊犁定約俄人必無反覆照章通商藉得經營善後安定百年久大之規非公大才奚以指施裕如哉 聖眷物望遠近交孚雖蓋躬未甚復元而精神尙能理劇幸勿堅辭益勵晚節是所企禱台旃何時入 覲南雲幹臣善臣諸君皆可獨當一面之宿將不才

與爲聯絡臥護儘足放心如何撤留應暫緩議仍候鈞示酌商前總署寄到勅候續電照鈔呈覽目下畫押電報計亦抵都矣

復黎召民京卿

丹崖多杪來函鐵甲每艘須派監工二人徒匠十餘人第聞回華各生致函鄭清濂有創辦鐵甲正我輩富貴之日苟非高官厚祿切不可就等語深慮回華各生聚行挾制方商德海部僱華監工不敷儘可商派德水師監工代勞費亦不多請卽會同尊處酌定今旣蒙派定魏瀚陳兆翔陸麟清三生並帶匠首七人充藝徒同往不惟監造得力將來學成仿造不患無匠魏陳二生尤鴻章與丹崖所盼望揀派者具徵籌謀久遠造就人材之至意該員匠等想於正月間搭船起程矣閩廠生徒一得自矜貪慕榮利雖未敢聚行挾制而習氣實不能免由於從前過於姑息執事莅工以來隨事整飭愧厲之趨向當稍改變承派學生來津備充蚊船管駕大二

副管輪管礮之選蚊船輪機精巧尤必管輪得力前咨漏未提及臘月六日函內復申言之儻未選派務求迅速補選管輪三四人備用爲感吉林開廠創舉得人非易惟允觀督在船政始終其事胸有成竹自可勝任愉快俄事改定銘將軍迄未催辦吳清卿與之不合亦有退志且該處工料毫無憑藉經費亦無著落客俟惟允到津妥商一切謀定後動自應勿先具奏泰西製造之精一由公私學堂認真督課一由官民合辦爭寄競時中土祇船政有學堂而生徒亦少所以久而無效尊意先開槍廠專造後膛槍格林礮近日甯局亦能仿造格林礮及施立盟送來之那登飛礮二者大同小異但那登飛礮專爲擊水雷快艇而設西國兵船多用之格林礮則陸軍守營攻隊較宜惟林明登後膛槍與格林礮子式相同可以通用近與丹崖等詳確考驗各國皆有新式後膛槍林明登已爲中下之品滬局能造而各營多不願領若欲試造必須擇一新式如英之亨利馬梯

泥法之格拉德之毛瑟美之哈乞開思皆可仿照第聞每種造槍機器非二三十萬金莫辦加以建廠鳩匠爲費不貲無已或先仿造那登飛於兵船制雷艇最爲適用甯局既能仿造尊處更易爲力前與施立盟訂購十尊尙未運到俟到時自可酌借一架作樣也外洋貿易一事梁陳三君果願合辦集股二十萬元已否就緒如有成局敝處當酌助公款二萬金但望諄屬經手者妥慎試辦聞西國商會把持傾擠必不能免根腳立穩則擴充招徠自易耳快船繪圖造模逐漸興工觀成有日曷任欣盼魏陳二生遠去計程功必不能速也訪侯畫押後已請假兩月回巴黎丹崖函告日意格已先回勅侯留用與否並無續信以理度之俄議已成似監督薪水可裁祈酌辦並電屬丹崖轉商訪侯爲幸左相到京奉 旨入直 樞廷總署惜其於近日洋務尙多隔膜卽如奏稱船政造成各船可敵俄人東來鐵艦可爲笑柄

二月二十一日復張廉卿中翰

敝鄉人議脩廬州府志家弟季荃爲之倡曾有敦請執事纂輯之說蓋因嘉慶初年舊志乃姬傳先生主筆今求私淑惜抱後先輝映者非公其誰與歸季弟忽於去臘奄逝昨吳筱軒函稱與閣下已有成言佩慰無似鴻章離鄉久且遠未知郡志現係何人接辦擬卽寫書查詢如局事未散志稿稍有頭緒仍令包封遞甯隨時求教筆削潤色俾底於成曷任感盼
致吳伯華觀晉

吾郡志書關係鄉邦文獻必應及時脩輯舍季弟慨然倡議並勸閭郡現任文武暨各營醴資已有成數近年家報中屢經商及兄方慮其不克終局正初得季弟奄逝之信其經手未了公事惟此件尙無頭緒實無以對鄉人枵姪少不更事學淺望輕斷不足善其後已函諭其力辭志局提調適省三在津與商接辦之人謂非執事不可正與鄙見相符曾屬香晚先

爲轉致頃舍四弟來信亦以非請閣下主持經理善舉必至中輟屈指舊時同學同患難今尙在家者惟執事巋然獨存此等要舉衆望所歸實屬責無旁貸義無可辭務求引爲己任會同太守安定章程嚴杜浮冒以期早日成書是所切盼林遠村本非著作之手老憊顛連已允辭纂脩一席季弟前有請張廉卿裕釗主筆之說吳筱軒函告已與議訂廉卿爲海內古文大手筆係兄至交昨又專緘布託鈔呈台覽但有分門採訪事實彙寄廉卿筆削不至媿陋貽譏省三昨已旋里兄亦面屬其隨時隨事與閣下商辦諒無推諉渠往來金陵正可晤商廉卿諮度一切也各處志局大率由公正紳士總辦太守事繁本難纖悉過問且恐有瞻徇情面濫竽薪水之處志書尙無眉目聞捐項已支用萬金不知作何開銷已函屬劉俊卿將現存八千餘兩俟接辦有人方准發交祈閣下參酌從前辦法另立新章如有怨謗鄙人當代任之將來成書時費用不繼容再商酌此函乞

便寄黃太守與局中人公閱爲幸

四月二十五日復鑒召民京卿

各生密考精當之至方伯謙覽署蚊船管駕洋弁頗稱其能林永升葉祖珪擬俟山東新購蚊船到津派充管駕黃建勛林頤啓派帶水雷兵隊隨洋弁教習冀可有成至揚則哲等七生學力尙淺尊論均不足培成大器祇可留備新船派用承續派管輪七員學生二名何時可到管礮既無熟手姑從緩議山東蚊船須六七月乃來屆時或由舊船勻撥留洋兵照料可耳春帆宿恙增劇力辭差使此間辦辦水師學堂練船需人接替適惟允過晤已 奏派是差吉林三姓甯古塔防務清卿甫經奉 旨督辦尙未議及船廠且亦無此巨款也惟允所帶製造繪圖兩學生擬交大沽船陽差遣威遠船聞已北來途中攔淺在滬脩理未到濟安覽調赴浙不日想亦赴津英廠碰快船月內啓行將來擬在旅順口扼紮老營非多得數

船併成一小枝不足張海上聲勢若連直東蚊快及各兵船計之約共十餘號可漸成軍乞公留意檄催該二船速行並將口糧名冊咨送接發爲幸外洋貿易招股已齊何時開辦俟官鐵礦與瑞國略同極爲難得羅臻祿等試辦當有把握擬令何人督工如已定議敝處二萬金即可滙付船政及南北機器局需用生熟鐵甚多洵爲當務之急惟購器安鑪聞須本銀二三十萬一時能集事否唐景星初議開平煤鐵並采今連開河築路已用去七十萬僅可日出煤數百噸疑其用人立法未盡核實故此事尤以得人爲要義也尊處快船開工而經費未能濟用殊爲系念粵海關欠解北洋額稅極多素習疲玩南洋可另籌撥否學生出洋比當定議矣鴻章於三月二十日入都叩謁 東聖梓宮適有會商事件四月望始回五月三日復左相

擬加洋藥釐稅節略較前示更爲詳明各口釐捐如何加法儘可由我自

主不必謀之外人但華洋商人交手後捐愈重則偷漏愈多所以必須中外會議允協或由香港派員整收分撥或由各口新關總收滲漏較少威使覲定此旨故作刁難實爲狡滑非真糊塗也鴻章回津後適有英外部專人赴威使處探詢中國歲銷洋藥確數欲就商添包稅釐之法來謁時業將尊意索加數目告知彼謂回英與印度部商及昨瓊州鎮彭玉過謁據稱由香港來亦聞英官與華商議設公司包加各省稅釐未卜果有成局否此事非英人盡諾實力幫助恐終無實濟耳貴部親軍與閩青方伯一簪均報行次涿州永濟橋內外淤沙挑移不易勞苦可念大旆尙擬前往察勘能否緩俟秋涼直屬水患除永定河在夾牆中行非另開河道別無治法此外則自漳沱改道後汎濫於河間任邱文安大城各屬爲害較烈頃在獻縣開數十里減河使於中途引歸子牙正河又大清下游壅淤令在文霸境內挑濬丈餘今秋當易歸壑皆僅擇要爲之據省局司道勘

詳上游應濬之工以雄縣清河蠡高潞龍河爲最容卽鈔咨冰案惟該兩河淤曲太甚工段太長似非兵夫二千人所能剋期圖功若募民夫協挑需費尤巨無可籌措目下伏汛將屆亦非其時乞大才通籌全局就近商請恭藹兩邸指示爲幸保安大屯村驛夫斃命經王守查辦正法具仰紀律嚴明欽佩奚似沅翁回湘尙無來信聞其過鄂足疾漸瘳頃栗誠樞眷附輪南旋心緒當益惡劣

五月四日復黎召民京卿

呂庭芷品端守潔上年指分來直適值停分展限之際姑予局差以維繫之春季假回並未聲明辭退念其日暮途窮每爲軫惜旋聞有就閩幕之說適接尊示邀任船政提調似足鎮式浮鷺雖船務機器素非熟習而精細廉靜涉歷稍久當可爲執事臂指之助庭芷前爲左相奏調新疆差委將來到省必于部駁船政爲海防根本用人可不拘成格如能附片奏

明他日出路更寬藉以脫卸新疆亦妙矣頃接丹崖來函並鈔劄剛函稿照錄呈覽續批學生如須出洋人數較少或將日意格薪水酌減仍令幫同星使照料以資熟手望卽酌定逕覆爲荷管輪七人已到飭留營學習矣

五月二十一日復左相

繕刻洋藥請加稅釐大疏剴切詳明欽佩奚似尊意以重罰爲嚴禁名正言順極合政體各省自應齊心振作竭力籌辦惟各口一聞此信奸商立將到口洋藥儘數收購囤儲以待出示加價時運銷射利數倍將來卽照議倍加販者少來購者停滯皆意中事各處特藥釐爲緊餉不免多一計較又釐捐愈重偷漏愈多較前收數必不能甚旺耳見飭關局詳切覆議再行核辦誠如尊論各處事體難以強同當有因時制宜之法也

六月二日復左相

枉過暢聆教言送別河干依戀靡既昨奉手示並讀大咨當卽照錄咨呈
兩邸鈔圖分致各處咨覆冰案矣文內附陳管見行永定河道諮訪妥議
以期實事求是當蒙鑒亮日內計已抵涿永濟橋上下淤沙挑除想漸就
緒暑雨不時水潦將至弁勇勞苦日久洵可小休漳沱減河勢順據工員
史道及獻縣分報兩後增漲竟能奪溜全歸子牙正河堪慰盡廬兩邸處
或須埃大駕莅都始挈銜入告也

六月四日致丁稚璜宮保

閱邸鈔敬審 眷倚日隆光復舊物公忠弼亮上契 主知下孚衆望忭
慰莫名弟於三月中旬 奏准叩謁 東太后梓宮奉 禧聖面諭與
樞垣會商邊海防務卽以銅面鐵甲船僅訂一隻李丹崖續函約共需銀
一百六十餘萬亟須續訂一隻而撥款萬不敷用因請提淮鹽捐項六十
萬及尊處去春奏明備撥之三十萬諸公均以爲然旋津後卽專疏馳陳

鈔咨冰鑒頃奉部議照准計亦移行執事遵辦矣鐵艦爲防海利器尊意亦敦趣添購幸得丹崖星使在西洋考究有年此次所訂實係新式無美不備觀日本所購舊鐵甲固相去倍蓰卽英法俄來華之鐵船亦尙不如其精堅利用故價目少昂將來我公量移東南擊楫中流非此等不足以備先驅而資策應鄙人遇病求艾未雨撤桑惟足下可引爲同志乃敢以巨款再三瑣瀆仰累蓋籌亦知鹽釐湊集匪易協撥尙多第非常之需必待非常之人以助成之如蒙鑒允祈委員分批解交湖北轉運局蒯道德標察收轉解應用爲感准軍額餉與此另款無涉並懇飭司局照常籌撥藉濟口食勿相牽混無厭之求高明定蒙原亮也左相精力甚健於樞廷政務各省情形不甚了澈所建練旅兵借洋債興畿輔水利加洋藥稅釐諸議似屬數時要政卻近老生常談恐有格於時勢不能盡行之處昨由涿州來津察勘河道暢談三日稍知直境水利難興爲林文忠以前諸

公議論所惑然其心地光明耐勞好強固君子人也昨覆陳河道一疏奉
呈教正价藩計已回蜀驚弓之後歷練更深劉六如士奇從軍最久幹練
曉暢可當一面頃赴建昌鎮任乞加意驅遣之

六月五日復李丹崖星使

自春徂夏迭奉手書緣二號鐵甲未有成議倥偬久未泐覆昨始奉部議
覆准撥款除鈔咨外茲將應復各事條列於後

一四月二十六日寄電云二月初十前來信收到請照現定鋼面鐵甲原
式再訂一船等語目下鋼鐵市價已漸平否若照原式再訂價目能少減
否仍與伏耳鏗續定合同否款既有著應趁閣下在洋定辦以期駕輕就
熟非鴻章所敢臆度遙制總求執事妥細酌辦廠中料物須防偷減工程
須防草率調到監工藝徒等監造兩船如不敷用須商海部代辦不致偏
護欺蒙否

一送到鐵艦合同照鈔咨送總署南洋船政各處並將補就圖幅寄去
一船價付期第一號應照來單飭江海關道按期滙寄第二號俟尊處續
訂電信到後再行飭滙若遇磅價低時買票滙寄尤爲合算望核定用款
備一咨文知照敝處籌付爲要

一既商訂保固到津後三箇月由廠雇正副管輪並借重德員作船主似
不能照英廠碰快船之例派員前往管駕屆時或卽派監工藝徒等隨同
分充各執事水手人等應否由津閩各船選派出洋抑應在西洋雇充均
望豫籌示遵船成下水應照碰快船例升掛中國龍旂

一兩號鐵船工竣計須至八年年底閣下必應始終其事使德瓜期雖不
甚遠而 新命兼使義奧荷蘭尙須三年交替幸勿急求回華弟在京時
已與總署言之

一現兼奧義各使想已分往呈遞 國書歲會之期再往暫住數日似無

須留員分駐各國交涉事件甚少除荷蘭外並無專使駐華義國總領事
僅常駐滬耳總署如何示諭僑添調參贊馬眉叔在津有經手要事礙難
遣行慶常徐仲虎議論殊屬無稽眉叔童時雖在教堂讀書今並不與教
士往來至方兒粗習英文英語涉獵未深因年輕尙須鄉試且有家務未
便遠游羅豐祿昨亦調津充水師營務矣

一花翎已奉 旨允又准部駁頃又附片頂奏必荷 特恩閩廠續批出
洋生徒尙無定期召民於此事似不甚踴躍玉軒已 簡美日祕公使
六月二十日復黎召民京卿

庭芷月初由津南下日內計已抵閩得人喪事忤慶奚如庭芷名心尙淡
然年近六旬亦當豫籌出路此時暫行 奏調使脫去新疆窠臼埃數年
後船務熟悉爲用方大也威遠昨已到津將來碰快船可併紮一處丁提
督稟稱新船入華擬順道至粵省及尊處查閱一切該船喫水較深恐不

能至南臺或在羅星塔一帶暫泊請示望飭催早日赴沽現尙未據報由英啓程似須秋間各省兵輪零星分布臨事斷難得力無如內外於此事均屬茫然平日置之不問有警紛紛調援皆紙上空談而已鄙意北洋各船到齊聚紮旅順口爲老營派人統率訓練稍壯聲勢惟該口雖甚扼要得勢凡築礮臺添陸軍建軍械庫煤廠船塢至少須費百萬以外一時未易就緒來年鐵甲船成當再請調濟安超武以附益之鎮海於津河爲宜陸倫華情形極熟祇好暫留供差出洋貿易一節比准大咨卽會南洋與尊銜入告並給諭商總咨復冰案轉交此係中國創舉該商等銳志經營不可稍掣其肘姑以五年爲限不准他人另行開設屆時察看如生意暢旺毫無流弊自可再請展限想尊意亦以爲然也絲茶銷市漸滯湖絲幫附搭正可窮究利病聞中土烘繭縲絲不甚如法該公司於抵倫敦時逐細考較尤與湖幫有益未知何時可以開辦俟官鑛礦小辦亦須酌用機

器鍋鑊冒澄聞已回籍肯力任此事否丹崖函稱日意格已允減薪水續批生徒出洋有期否吳筱軒軍門來津謂周鳳震人尙樸實前水手等挾嫌稟控查係子虛迭次救援外洋失事船隻頗稱得力似宜緩撤

六月二十三日復丁稚璜宮保

鹽局三十萬仰承金諾奉文後立即照行分批委解公忠碩畫真能以天下爲己任者環顧並世殆無儔匹前在都見樞農各堂均以俄約賠款五百萬無措爲詞弟力言若不速籌訂購鐵甲整頓水師則以後遇事生波賠款尙不止此再四商議始允以川淮鹽款見畀然非深知我公於軍國大計瞭然掌上而日往來於胸中亦未敢冒昧陳乞也丹崖星使電報續訂第二號鐵艦正在議辦大約分批滙兌可以年半解足爲期鹽局若有爲難不妨陸續抽撥若公常在蜀知必源源應手惟曾沅翁久病未愈自栗誠病歿其次郎又委頓在牀心緒惡劣聞七月間籲請開缺必可邀

准西陲非楚人莫辦則東南一席舍執事其誰與歸屆時如有調動務懇將此項奏定分期撥解勿稍延欠俾後來者不致失信感企曷任日本議球事未協彼仍據守如故 內意亦未催問不致遽開兵端但球事一日未結中倭之交不固卽防備不可或疎北三口照常布置霆軍已撤一半餘俟秋後再遣藉節餉需蒙屬慎重以圖書紳敬佩近得撫屏書 禧聖諸患俱平僅背熱偶有輕重擬二十五日卽報大安 臨朝治事詢中外臣民之福自津至滬創設陸路電線冬內計可完工峴莊並擬由金陵接做鎮江從此南北通信瞬息往還極爲靈便黎召民勸集粵商公司赴倫敦貿易已有成局此近事稍可告慰者左相奏請洋藥加釐恐偷漏愈多鄙意欲在香港總匯處抽收未卜果有成否

六月二十四日致曾劄剛星使

移節俄都互換事竣卽回巴黎動靜多嘉至爲頌企沅丈病未甚愈聞因

思臣病篤心緒更惡七月當籲請開缺交收伊犁及喀塔各處定界事宜
金錫劉各帥計必照約妥辦不至別生枝節也左相與威使議加洋藥稅
釐不協乃奏請各省關自行辦理每箱連新關額稅通加至一百五十兩
廷旨嚴飭各疆吏事在必行左公以加稅釐示罰禁欲洋藥漸來漸少
意固甚善惟各口未加釐之先香港每年偷漏已二萬餘箱之多將來各
口驟加則香港及各處偷漏繞越弊必更甚誠恐得不償失而鴉片來華
仍不能減適有粵商議於香港創設公司包運包銷包完各省稅釐政府
亦有以爲然者兄昨於議覆左相加稅釐疏內附片及之聊備一說鈔呈
台覽此事關係重大必須印度與香港英官允行方可試辦威使陰庇印
度餉源英商生意一味狡猾無可商議敝處擬派馬道建忠改裝前往香
港印度各埠密察商情就便賁函徑晤各該處總督討論一切大意以中
英兩面大局在我須免偷漏稅餉在彼須保印度入款如何妥籌漸減漸

少之法若有成議再看華商能否集貲設立公司英員能否照允欲先洞悉底細乃有辦法此係鄙人私見並未商明譯署第恐馬道至香港印度後彼或電報外部僑向執事詢及乞將微意轉告爲幸

七月十二日復李若農讀學

手示於粵東洋藥利病洞悉本末瞭如指掌左相未深知各省洋藥走私擊肘情形貿然奏請加征過重弟在京時曾告以釐捐愈重偷漏愈多更恐變本加厲此各省歷年欲請增加而不敢遽行者政府諸公亦極言其難左相毅然獨斷乃有此通飭之旨近聞峴莊制軍亦覆稱上海未能照行如必欲行須由總署與英使定議毫無掣肘而後可振帥想亦同此遲疑也尊論有顏曾冉季之德行兼用申韓之法術洵爲破的試思德行政事固難其人申韓法術亦豈能復行於今日者循行故事之冗員營私仇法之武弁愍不畏死之奸民蓋徧天下皆是矣政府能言之而不能親

身以禦走漏督撫能杜走漏又焉得許多賢能廉介之員供其驅使始終如一且恐因以激變紛擾藉寇竇盜予人口實且通商條約原准洋商在口售賣洋藥釐捐加重必羣然勾結洋商自賣分毫無徵此偷漏之大者更無法可防也英官沙苗前來津謁晤欲與華官合辦洋藥稅旋聞李玉衡等糾合粵商湊貲設立公司包辦未知果可靠否又未知港督與印度英酋肯任承攬否以中國抽數與英人共之本難深信但議加稅釐必須在洋藥發源處設法使無可偷漏明公其有意乎幸隨時確訪密示爲荷
七月二十二日復丁稚璜宮保

鹽局三十萬擬分三批委解約冬間便可解齊前請委解武昌轉運局茲更補咨備案伏乞鑒照現銀頗費周折自應交安實匯號分兌滬鄂常有輪船來往轉解甚便鄂生觀察月初過津暢談閱歷更深氣度益覺闊遠深爲左右得人慶惟奏定留蜀升轉誠鹽政萬不可少之人而升途未免

稍隘彼且慮旌節他移在上無主持亦難乎爲下矣弟屬其抵京後將此意婉陳當路必有善處之方何子錢常有信來謂日本竟將球事攔起彼已據爲己有祇要我不往索觀若固然尙無必欲致死於我之意但防備不可少鬆耳津關道鄭玉軒已放美日祕三國公使叔耘才堪專對但內意尙未共信容當設法位置以培其資望蒞齊尙未回華而謠譟甚多使倭恐將中變可見流俗毀譽之無定評也

閏月二十五日復左相

閻青方伯等入山履勘日內計有定議儒能如卓見擇地伐石築壩鑿渠俾上游節節湔溜疏洩得宜不致盛漲時復被衝塌如往歲玲瓏壩故事洶於永定全局有裨至下游工段土方前飭該河道於秋汛後確勘估計各軍於明春凌汛後分段興作原以渾流漲落不時向例霜降後始報安瀾屆期牽繩量度較有把握若勘估過早積潦未降道路難通且恐續有

漫溢情形變遷未能作準該河道自夏至上汛駐防隨時分投督查搶險
須待霜清撤防回署雖無四載行水之勞實非安坐行館可比容卽飭催
其勉遵大旨早爲親往相度稟覆再行咨請酌核蒔農所部土壩已成似
應略予休養 陵差期近直屬將吏奔走竭蹶之不遑淮練各營亦宜埃
明春調令赴工心志乃可專壹匪獨水涸桑乾便於畚鍤也諸乞鑒原直
屬交代疲玩經飭藩司嚴定章程非欠款清繳不得補署曹令壬泰積通
太多礙難以一人撓衆法既蒙厚意矜恤當徐商之方伯未卜有法可設
否執事得暇休息自可剋期康復襄贊 樞廷以慰衆望幸無再伸前請
閏月二十九日致游子岱觀察

左爵相函催勘估永定下游工段昨已專檄飭催諒蒙鑒照頃又接二十
七日臧稱王閫青等履勘上游宜建壩八處尙可圖成已屬其回營整備
至王蒔農擬率親軍三哨弁勇一千四百餘名赴下游會辦俟涿州三合

土堤苦蓋旬後畢事亦可移帳就工請速飭尊處將土方編審明確水平
既得深淺廣狹放之而準湘軍得以分段賦役距冰凍之期尙早自可從
容助理若直省淮練各營現供 陵差不遑啓處祇須定議會辦或先或
後正亦無妨等語是侯相與蒞農觀察之意必欲秋間赴工則勘估不宜
再遲務望執事督同廳汛及老練弁目卽日馳往南七八工以下按照前
章段落切實勘明如何擇要妥辦核計出土遠近土方若干湘軍約以千
五百人爲率淮練各營以三千人爲率就人數分定段落約三箇月竣工
詳晰具覆以憑核咨 陵差在邇弟將督率各軍沿途護衛勢不暇分隊
就工洵如左相所云或先或後仍是會辦一事卽於來春蒞役可耳再尊
處勘估既定似應就近函邀蒞農觀察單騎先往覆勘並妥籌移營興工
事宜再行定議庶更詳慎尙希酌裁

八月七日復左相

永定上游閩青方伯勘定建壩八處重關疊鎖控扼渾流較乾隆間但建玲瓏一壩者勢力倍厚但使蓄洩得宜經久不壞當於全河機局有裨頃准大咨飭地方文武幫同照料已分行遵辦矣薊農一軍既擬秋涼移帳就工前屬游子岱卽日馳往南七八工以下切實勘估約照楚淮兩軍人數分定段落並令子岱就近函邀薊農先往覆勘定議計距封凍尙有兩月卽不能一氣呵成明春凌汛後仍可補做至陵差在遼直屬練軍分供道段護衛其在各海口礮臺者亦不便遽行抽調是以迭次咨函均懇明來春酌撥助役茲承諭會辦一事或先或後各有不同未宜概論明恕察物欽感曷任該河道先將段落分定明春敝軍限三箇月蒞事亦不誤汛漲之期也執事龍馬精神終日不勸有少壯人所不可及者卽腰腳不宜行跪坐而論道無庸常川入直本有故事可援朝廷眷注老成豈容肥遯幸勿爲再三之瀆鄒牧振岳口外墾荒事宜亟待清理尊意准其覈

往弟亦批令遵照曹令王泰貧窘可憐參迫自應從緩

八月八日復曾劄剛星使

栗誠懷才未遇中道催折賴有賢兄擔荷家事其世兄重伯英年嗜學可卜爲遠到令器目前處境之豐嗇自不煩遠慮也沅丈自思臣繼逝老懷更益難堪前請開缺又蒙 賞三月假未知近日體氣果康復否或謂兩江需人峴帥 內召雪翁堅辭可冀量移亦未卜 廷推及之否洋藥加稅釐一節迄無定議馬建忠往晤香港印度兩督據其電信印督謂中國統買洋藥大意可行官辦尤妙樂從無阻惟價數宜定及一年遞減或五年通減箱數並三十五年限各節事關交涉宜公使商酌此地難定等語該道卽日回津官辦公司殊多窒礙商酌亦難有把握威使意在各海關稅釐並收聞可加至每箱九十兩香港燕督昨過津晤譚祗要威使及印督如何定議渠必協力幫助又謂粵犯已允照交惟駐粵領事多方阻

指赴京當再商威公又謂香港設領事亦可商辦似與外部議論稍異謹以附聞海參威設領事會屬駐津俄會轉商凱署使以爲可行其外部意見若何想有復信在途布策早晚回華一切均易商定碰快船途中尙順計秋節後可抵大沽瞬屆期滿傳言 內意將派黎召民爲替人尙在未定召民頭暈肝病堅辭出洋英法俄三大國必須資望素優可資聯絡恐不免躊躇四顧耳

八月十七日復李丹崖星使

商訂第二鐵艦及驗收雷艇魚雷各節精詳周密綜覈無遺至爲欽佩第二艦造法工料程式尺寸與第一號絲毫不易惟左右水線下最低處厚薄不同改用全鐵定價六百二十九萬七千五百馬克已據滬道錄報電信雖較第一艦略貴而監工匠首可歸原班兼辦尊處亦得就近稽查一切節目無須重複駁論所省實多譯鈔合同想已在途前准總署函屬第

一艦題名七月二十五日曾電致十五字名曰定遠計早收到將來第二艦或即名曰鎮遠何如又於閏七月初四日電致二十四生脫礙開春起運再電知等語亮亦照辦矣第二艦付價日期仍望酌定咨明敝處並知照滬道以便陸續先期籌匯庶無遲誤第一二號雷艇及魚雷二十尾先後發運封河前到滬開河來津當再勘驗管輪精匠前飭蕪林電屬代雇並學習魚雷之生徒俱隨艇同來爲盼魏瀚所稱英廠碰快船九病頗有見地未知過印度洋有無險阻約計月杪當抵大沽仍俟隨時察商補救至尊諭旅順口礮臺不甚穩妥似未深悉北洋形勢渤澥乃一小海如葫蘆形旅順與登州相對僅百二十里口內有塘可泊多船正葫蘆之頸也敵必經口外以達津沽營口有險可扼視煙臺大淺灣之散漫無收束者迥殊異日北洋水師總埠船塢均當在彼建置卽兩鐵艦亦宜駐泊軍火糧餉均須儲蓄乃可備緩急各國水師名將皆謂得地卓見獨不謂然何

耶羅豐祿學有根柢當差甚勤

十一月十七日復丁稚璜宮保

鐵甲船款及淮軍協餉均蒙儘數籌解俾海防得以逐漸籌維非以天下爲己任者不能具此魄力豈獨餉生感佩私情也左相請假回籍掃墓約開春赴金陵自云到任後另有辦法如銳意復淮鄂餉固有闕礙川鹽能否截止在農部之意原不欲其另變新章但此公好勝逞強難保不爲楚商所慫動事關數省大局究非可獨行其志望公與家兄合力謀之其必不可行者固無妨執簡而爭也洋務則由總署主持若變亂約章各使必從中撓潰近屢晤談不但無鞭撻四夷之心抑且無經營海上之志外強中乾概可知已洋藥一事總署現擬另議辦法不敢苟同貽誤政由中出彼亦無如之何尊患肝氣自因庶政煩勞老年人須常服補劑遇少不如意事度外置之則肝疾可漸平蜀中人情浮囂謗議似未盡息而謀國之

忠誠任事之果毅實已深結 主知倚畀正殷比當力疾銷假以慰衆望
劉鎮蒙飭赴任歧子惠想亦履新在旗員中可爲和厚長者

十一月二十日復劉峴莊制軍

手示寵辱不驚措施如意時艱責重任事者豈能盡免人言雪帥既不肯
自爲又於局外苛加指摘曾文正嘗謂其不達大體於斯益信矣 朝廷
知公可當大事若非左侯相再三求去無可位置則江左夷吾必不能輕
棄也左相威望才略自以外任爲宜近因年高精神似稍散漫江南自文
正創造規模可大可久諸賢接踵蕭規曹隨士民欽服公雖去官有日未
便忽然於遠近皈依之誠望交替時詳告而諄勸之勿過更張爲幸舍親
趙梓芳心地長厚弟常誚其粥粥無能不知雪帥何以見罪其於鄙人三
十年患難至交無纖芥之隙片稿中似惡其人而波及親戚者未免顛倒
過甚承公據實洵雪殊代感激政府中似亦知其屈抑矣琴西素有清望

洵不可多得之人才若因承審命案註誤尤爲可惜昨已奉 旨解任能免餘罪尙賴保全招商局前案反覆推求實無吞使中金證據似須照總署奏覆會奏完結昨已咨商冰案乞早賜復以便敘稿該局屢招謗議尊處前糾自因傳聞未確想大君子與人爲善之心必無膠執也

十一月二十二日致李丹崖星使

昨接電報初八定遠艦出陽等字樣甚爲欣慰十月杪赫德稅司寄來阿摩士莊擬造新式鐵甲船節略三件據稱造法實屬盡善核其所論各節多中肯綮其船中置礮臺之鐵船與德廠現訂定遠等艦形勢相仿惟略異者定遠長二百八十尺彼長二百尺闊六十尺彼寬五十尺入水十九尺彼二十一尺機器馬力五千餘彼馬力六千每小時行十四海里半彼可行十五海里水線處十四寸鐵甲彼十寸礮臺處十二寸鐵甲彼九寸他處則未詳及臺內之礮四尊各三十零半生密答彼係後門二十六噸

四尊首尾用二十一生密答礮各一尊彼則船面六十四噸礮五尊又有
格林礮二尊置於網桅上我船所無也船底全作夾層彼則船底夾層外
船幫亦有夾層與我船前後有中壁同否煤僅備緩行十日速行三日彼
則緩行可兩月速行可八日夜定遠船礮價約三十七萬磅零彼船礮價
則三十萬磅相去遠甚至帶礮樓之鐵甲與左右前後置礮之兵船似與
定遠等式不同每點鐘行十六海里船礮價五十萬磅雖較貴而駛行甚
速據稱歐洲各國尙未造有鐵甲船一點鐘行十六海里者是否乞詳細
考訂赫德未將原圖寄到無從細核阿摩士莊本著名大廠先後代訂較
快船十三隻價值不昂似甚要好寄來各項鐵甲造法欲將何處制勝何
處爭奇指示大概彼再畫圖送酌未知尊處與該廠熟習否或將如何制
勝爭奇之處詳確開示弟卽轉屬赫德金登幹等轉致亦可附呈原函件
祈迅速核定示知

十二月十九日復涂朗軒中丞

玉階尙無大過惟不滿於巨紳之口湘帥殊不易爲我公德望政績久爲
彼都人士所欽頌駕輕就熟左右贊襄得人自可不勞而理聞恪靖已於
臘八日起程赴任過鄂尙有勾留否家兄久有退志詎言者爲卯金同鄉
再圖報復媒孽多端致煩重臣覆按適老母宿恙未愈已先請假懇系曷
任洪琴西緣三牌樓命案解任昨有人因原奏疑竇多端請另派大員
勘審麟尙書薛侍郎遂承命南下而峴帥函告供證確鑿未知是一是
二琴翁能羅重咎否近日言路紛厯風波迭起可爲寒心潘牧青照開復
雖奉旨允聞部中仍須議駁殊費周張直豫晉均未得大雪冬陽不藏
亦可慮也

十二月二十二日復丁稚璜宮保

左公自贈到任後自有辦法其近名而多意氣政府同事靡不深知若更

張過驟銳意復淮不但川鄂必須力持農部亦斷不能順手也法人久占越南六省又添造兵船欲由瀾滄江上通雲南曾劄侯正與該外部辨爭蔭帥老景頹唐於脩內禦外之政不甚著力聞有以嗜好素重上陳致煩覆按若得與公同心協力者慎固邊陲亦何慮外人之窺伺耶川鹽運銷漸旺庫儲當留有餘以備緩急鄂生行當大用未能久於其事接手者恪遵成法定可措置裕如

正月十八日復李丹崖星使

光緒八年

定遠於正月八日出陽一切順利賓僚咸集是日電報當即接到因在省未即電復也去冬既匯到六萬磅前接示後又飭滬關接續滙寄計可應付無誤惟屬請將按期預估兩號鐵艦付款備文咨明以便轉飭籌辦論公事必應如此來示以驗收駛回各費難以懸擬確數未能即咨但船礮各項已定之款久經議明儘可先行咨報聲明驗收駛回等費俟估約數

再咨敝處亦卽分起飭遵此項重大事件不得僅以私函爲憑盼切盼切
鐵盤是否兼用汽力人力鎮遠合同已否繕寄雷艇大礮裝子器等雇船
運送天津旅順口內當可運到鐵艦大字道遠轉寄不便望卽在洋酌辦
仲虎於臘初過晤於執事頗有違言均可不必深究惟據稱經辦鐵船未
暇專精料理僅以屬之閩廠年少學生此輩雖略諳西學習氣頗深名曰
在廠監造實未能事事考較設令該廠稍有偷減造不如法則巨款可惜
人言可虞等語仲虎與陳季同魏瀚等固未浹洽而所論恐非無因鄙人
於鐵艦一事獨力提倡籌款極艱將來若造不如法議者必將譏起此私
衷所尤兢兢者乞執事隨時督同各監工等認真考覈勿任嬉游敷衍蒙
蔽草率免貽後悔是爲至要該學生等雖相從多年切不可信之太深不
加督責也此間實無精通製造之員可以派往不得不責成執事獨爲其
難幸諒之仲虎赴京度歲聞引見似辦不成恐亦難免徧告廷僚耳

正月二十日復張振軒制軍

總署鈔寄臘杪函稿及唐廷庚馬復賁等海防來稟具徵籌畫精密委任得人總署亦甚嘉佩唐道往順化見越王如何議論馬大使查勘東京至保勝如何情形諒有續報祈隨時鈔示爲幸紅江上游水淺灘多兵輪斷不能深入卽法人現有之鋼皮蚊船據稱有百磅後膛大礮似喫水當不止二三尺馬力亦不能甚大若保勝上游逐節淺灘勢難任意行駛法人不過張聲勢以翼嚇散土匪耳西國用兵慎重必不孟浪越中北圻地勢大有可爲全在該國辦理得法孱王恐未足與圖存或爲法人所賺則無如何矣然粵西有黃桂蘭一軍自足固圍滇南爲紅江上源蔭帥前疏徒騷過於日本此間於大局之言儘竟一籌莫展或須易人而治 廷議當有斟酌也鄂案先將藝芳覲職芝初開缺並無實在劣迹左公蓋藉以立威月內外諒可奏結家兄處之坦然而官興冰冷如不去位亦將求去也

老母服藥調理漸就痊可惟高年經此久病飲食未能多進精神未能如常焦慮曷極撫屏仍補惠潮極承照拂 聖躬難遽康復銷差無期露軒何時到省能暫署否溫雲已暫留差委

正月二十三日復黎召民京卿

美國調回學生洋文洋語多已精熟惟洋氣既深華文太淺現撥歸後學堂有名師嚴立規矩似須三二年後水師稍入門逕乃可再派出洋頃接丹崖星使臘初來函以尊處電調鄭清濂回閩監造快船擬俟魏瀚由英回德卽令鄭生回閩惟兩鐵艦工程正緊監驗一切需人欲將新派出洋之十生內選派數人往德襄助兼資學習以省往返調遣之費並請奏明十生中在德學習者歸丹崖專理在法學習者歸勛侯專理而以洋監督襄理之其文牘等卽由兩使館兼辦無須另員省卻無限周折牽掣等語查前此學生在洋勛侯來信頗有違言其在英法習藝而未令公使節制

本不甚妥是以此次續遣學生會摺內已奏明由曾李兩公使照料勸侯
少有脾氣與丹崖素不相能茲丹崖擬請在德在法者分歸專理各有責
成固不必再爲演奏似應由尊處主稿挈敝銜咨明兩使照辦或加函奉
商曲爲調停以期有濟德廠鐵艦以學習兼監驗實不可少祈酌辦爲幸
快船工程若何經費能否接濟呂文經短勇過多僅予撤委已屬從寬各
船管帶稍知儆否黎純齋坐馭遠兵船赴日本函告該船機器屢壞屢脩
海道生疏由於平日少令出洋之故各口兵船須令常行出洋游歷操演
藉習風濤沙線庶臨事尙可得用似應由尊處咨商各督撫勉力爲之否
則局勢太散實可隱憂左相於西國水師統要茫未有知恐未必大有振
作也肇興公司頭船抵英未知若何布置生意可立腳否招商局近來甚
爲興旺而左帥嘗其僅爲商人射利於 國家無益亦可謂闇於大局矣
五月二十八日復李丹崖欽使

定遠艦須七月杪交收派劉步蟾等前往學習觀摩已於二月間咨明總署未便中止該員聞於五月中旬起程比當至德皆昔隨執事在洋肄習者而劉步蟾尤來咨所評品擊賞堪派管駕鐵艦之人隸北洋數年屢經嚴切教誡近稍謹飭尋函述日意格語明敏而輕躁恐易愆事該生輕躁誠所不免晤時望加訓迪提撕爲要計六月杪抵德去驗駛之期不遠耗費似尙無多管輪管爐之弁隨船閱看登記其日記須回華繳核幸切屬照辦所雇德國船主果係向帶鐵艦兼明魚雷之員性情和厚兼諳英語留華教習甚爲有益劉步蟾每謂水師人才以英國爲最方欲訪求延訂如德員熟習可靠或卽與商明妥訂合同總之一船不可雇用兩國之人務祈大才酌定見示伏耳鏗仿造長百尺十八海里之雷艇據云第二艦艙面規畫空地儘可附裝可省折合及運費似屬一舉兩得造兩艘爲費幾何乞預籌辦祇求雷艇合用省費尊處當代作主張電屬蕭林稟付價

銀可耳仲虎在京難免謫誅僕曾密告總署諒不爲動暨留一年專爲督造鐵艦望勉力圖成以副衆望鴻章奔喪回里合葬之期須明年三月擬百日假滿仍續懇展未知能奉 准否

六月三十日復張振軒制軍

朝鮮民志未定國使館殺傷數人阻擾公使各節皆違和約背公法者日本因我主持英美約事正深憤嫉忽生此意外波瀾予以口實既派兵船步隊前往雖似恫喝實有與師問罪之意眉叔二十二自滬來函是晚卽附輪船北旋想已同丁兩亭帶船東渡矣相機調停自是不易辦法頃復奉二十四日 寄諭一道恭錄呈覽內有朝鮮王宮同時被劫 諭尊處調撥水陸兩軍前往等因查北洋僅超勇揚威威遠鎮海四船可撥正焦慮間又接金陵函報滬道電稟調登瀛洲馭遠二船偕往具徵調度得宜惟朝事輻輳殊多亂黨當仍是去秋滋事之人既劫王宮內外交訐該王

號令有所不行日人又乘勢逼迫誠恐星星之火浸成燎原此事似應分別辦理先令馬丁二君帶兵船速往少作聲勢幫同朝鮮君臣彈壓緝拏魁首一面商勸日本員將勿遽動兵靜候緝匪嚴辦王宮被刦則非其君臣主使可知罪有專屬於該朝廷無與也並於脩約各事無干未便藉此脅制致敗和局至調派陸軍尤須妥籌由陸則道路阻長雨水多滯轉運費艱由水則兵船裝載無多商船租雇費力或可號稱陸軍繼至先聲後實俟眉叔等到彼察看情勢再行稟辦計張虛聲則護衛親兵兩營小隊可矣若大舉有戰事惟銘軍在後路可調該將勇疏於謀似須添派稍有智略如吳殿元輩會同照料庶冀操縱合宜盛軍爲津防主隊人數較多未宜遠出鄙見商辦得法可無戰事仍是上年臺灣成樣耳兵難險度英雄所見想亦大略相同裕中丞傳知之 諭尙未奉到鄙意初擬俟葬事辦竣再取進止今 中旨迭催而前咨王夔翁文內原有假滿後海上或

有警報卽赴津籌辦之語。竊日紛爭。雖未足云警報。究於海防。微有關係。明知大才籌畫。悉合機宜。卽鴻章前去。亦斷無所增益。聖意殷盼。豈敢膜視。自食前言。現與家兄等酌商。候裕帥傳知。到後。東瀛續信如何。再行酌定。粵中人來謂。沅帥五月二十四由湘登舟。忽病發而止。果爾。則執事同任兩粵。固在意中。若無意南行。而鴻章被詔。迫趣終不免此行。祇可專辦通商。奉屈台旆。駐省經理直督事宜。兄必力爲籌助。無分畛域。服制期內。無再握畿篆之理。千祈卽須助我。勿少諉卸。平生風義。所以酬知己。慰友朋者。庶其在此。尊患腹滯。似由積濕。秋涼必漸痊愈。時事多艱。二三同志當爲國家鞠躬盡瘁也。眉叔寄閱所擬中東通商章程。大致甚妥。清卿函阻俄約陸路通商。與朝議相同。皆可隨機籌辦。佩卿任性乖張。似須撤回。蕪林軍械總理。不能遠離。子久志趣甚好。肯任此煩難否。或謂旅順各工。宜仿西洋局務章程。將銀錢工程分兩人。各有責成。可防流弊。徐

仲虎工程當尙精核如能任勞或令專辦工而以子久綜覈銀錢出入及聯絡營務是否可行乞卽妥酌飭遵其有不妥應再變通悉聽卓裁鄙人絕無成見也聞王詩正賄賣鹽票已派員查辦金陵晚節欠香行百里半九十可畏哉

七月二日復孫讀學

昨又堂妹丈至廬接奉四月二十一日手教猥以先慈之變重蒙唁慰殷拳寄賜輓聯褒榮逾格敬懸靈座哀感無似細詢又堂世弟嘉禮告成函丈提挈回甌佳兒佳婦繞膝承歡神明倍增疊鏢欣頌莫名道遠未及聞知有關慶賀至爲愧歉大二世弟文筆英雋秋闈鏖戰定有好音拭目以俟鴻章見星南奔過金陵時不便停輪走謁遇靈輦於大通攀號呼搶痛不欲生因偕家兄弟扶護同里暨厝家廟朝夕伴守忽忽已踰卒哭擬卜兆有期再北旋應 詔頃以東鄰有警迭奉 廷旨催迫憂患之餘形神

俱瘁豈復堪膺艱鉅畏此簡書彌增踴躍萬不得已祇可墨綬從事俟明
春相機乞假歸營窳劣少贖重愆豈勝隱疚吾師垂廬勞人想亦爲之矜
惻也三四世弟年華方富正可勉圖上進尊意仿鄧高密分授一業欲其
兼習西學夫西學在他日必有實用惟門逕甚多要自語言文字入手津
郡學堂重在造就水師人材自十五至二十歲素習漢文質幹樸健者乃
得入選肄習五年後上輪船操演再令出洋學藝兩年備充管駕及大二
副之用西國以水師爲第一等人中華雖稍輕武然他日輪船盛興將材
難得亦必推重是途如閩中世家子弟入學堂者現皆有所成就其明證
也其次兼習西學華英文法並精可充繙譯及參贊機器各局亦小用小
效世弟如性情相近志趣不凡似不妨酌擇派往入堂肄業惟夫子裁之
學堂規矩嚴謹較勝家塾亦不患沾染陋習也蘇伯廣經理滬釐頗有條
緒當爲上游器許聞溫郡館穀不豐近況尙可支否能遠出就講席否

七月四日復張振軒制軍

金允植二十一日致關道信所言情形不謬若李是應復爲戎首該國王及世子存亡莫卜此事殊大棘手眉叔兩亭於二十六由煙臺東駛計二十七晚可抵仁川探明若何情形必有確報如亂未有已自應速派陸兵繼進前書僅就津軍設想茲尊意擬令筱軒酌帶所部應之更爲便捷靈整筱軒智略穩慎足可勝任先馳赴津面商機宜可俟續報情形輕則先帶二營乘登瀛洲馭遠等船分載前往卽甚緊急其餘四營陸續東渡未爲晚也金魚二員謂陸師雖少亦可有戡定之道是斟酌情勢之言朝人無軍械而膽怯一見王師知必崩角祈屬筱軒勿過持重耳子戡於淮部氣類未孚此事但責令筱軒兩亭與眉叔相機商辦當能妥洽漳沱新河最暢可無佗慮裁五至今未到愚兄弟擬捐萬金併津局萬金交去皖災重於浙善後費多似浙之五千爲贅文也

七月五日致左相

鴻章侍奉几筵忽忽已逾卒哭擬於明春擇期合窆方欲續請展假連奉二十四二十九日 寄諭以朝鮮內亂情形危急趣令卽行起程赴津金革無避何敢拘執遷延北洋已派水陸各軍先往查探若亂未有已又有倭人乘機搆衅勢須斟酌續調一切兵餉機宜必須面商台端以圖合力共濟此間秋水瀰漫苦無舟楫前坐操江輪船機器窳敝赴滬修理未回務懇執事於金陵現泊輪船內檄派大船一隻往裕溪口小輪船一隻往巢湖施口迎候拖帶感荷高誼豈有涯量 廷寄二道錄呈台覽

七月二十六日復吳筱軒軍門

二十三到津接望日惠緘二十五日兩亭眉叔來詳詢一切敬審勞苦功多應機神速佩慰曷任日朝約款既經定議雖償款五十萬元嫌其稍多而朝鮮君臣自甘忍讓中國未便代爲翻悔都監營亂軍剿散亂黨羽翼

已孤王京內外人心當漸奠定現有貴部六營坐鎮彈壓嚴申紀律撫輯
流亡兵力似已足用無須添調多營徒滋煩費振帥原擬以黃鎮護衛練
軍三營應 命剋日東渡適鴻章過煙聞亂軍剿散日朝定約大局無虞
議令暫緩拔隊想執事公忠明恕必能默喻斯意也日朝和約第一款二
十日內朝鮮捕獲兇徒嚴究渠魁日本派員眼同究治等語我軍如有續
獲兇首應與朝鮮政府會訊明確再由朝自行知照日本究辦庶與約款
不背如日人意從寬大不欲深究則聽朝鮮自爲而已日本業經議和斷
無再啓衅端之理我更不必從旁生衅花房等若回王京帶有護衛兵員
我營應與之輯睦交道接禮儘駐營相近易於生事不妨量移城外扼要
訓練又聞我軍初到游勇頗多滋擾殊爲令名之累似宜默查各營如有
游勇散人盡數資遣商之兩亭派船送回免致逗留滋事營壘既成務督
令認真操練格外整肅俾日人朝人潛生敬畏吾弟素講治軍定不河漢

斯言耳日本兵未撤盡貴部必不可凱旋尙希強忍鎮靜隨事相機妥辦
爲要李是應罪狀難定然攬權估勢必不能遽准釋回昨奉 旨令鴻章
會同振帥訊究擬辦矣再閱金允植密信云亂軍皆四散帶兵器變服出
沒有結聚生事之機大軍一撤奇禍立至云云朝鮮兵數本單然非兵無
以立國亂黨魁首必須訪緝懲辦而脅從之衆招集解散尤要恩威並用
固結其心我軍一時斷難撤回務望吾弟會商朝鮮政府設法維持如何
保邦定亂之策庶免後患兄已奏明大院君卽在中土安置以終餘年其
黨聞知或能絕望反正也

八月三十日復吳清卿節使

朝鮮之亂起於軍卒譁餉而國王本生父因致政失志唆令國攻王宮使
館殺戮大臣實屬非常之變倭人師出有名幸振帥密商總署迅派水陸
各營馳往援護誘致亂首李是應剿捕餘黨日使奪氣乃就款以歸鄙人

在籍三奉 寄諭敦迫不得不冒暑就道航海北征迨抵津而事局稍有就緒朝使陸續西來就商善後比亦少妥貼矣日本索償兵費五十萬元朝人甘受脅逼竟自畫諾雖悔奚追其愚弱殊爲可憫昨遵 旨籌議通商水陸章程已鈔咨冰案內變通甯古塔與發源會甯市易一節悉如尊意核辦異日會訂設立關卡一切妥章擬請執事就近督同李秋亭察酌勘辦查由敵處彙奏並移朝王知照爲荷朝王咨請禮部轉奏刷還古種吉邊貧民恐俄人援例未知 廷旨若何彼頗欲治兵北道招徠逃人與吉邊犄角爲自強計但已隸我籍與役屬俄人者未必肯還卓裁以爲何如俄界各滿華民兩年內能否遷歸瑯塔塔境內劃疆而守若越界保護勢必不能俄人志在侵奪自未易與商也雙協領接統鎮邊等營操法均歸一律旗員將材難得及時訓練可備它日干城之選機器局設在吉省尙能籌顧否煤礦開采何似念念鴻章明春擬乞假歸經營葬事少贖重愆

九月九日復李丹崖欽使

朝鮮內亂 廷旨敦促北來比抵津而朝鮮已大致就緒現商辦該國善後事件水陸各營尙未卽撤前在英定購碰快船二隻此次赴援神速頗資其力 廷議有欲乘勢進圖日本責問球案者鄙意師船太單鐵艦未到尙難跨海遠征且碰快船亦嫌稍小擬再籌款添製快船二號屬赫德寄迭圖說另單照鈔呈核其式係照前訂碰快船礮加大約價銀十四萬磅本日已發電請尊處速向英德各廠查詢似此新式可否合宜抑另改何式價目若干想必費神諮度一切矣聞英新式快船有貴至二十數萬磅者亦有其式較小而行亦速價亦甚廉者中國海面與鐵艦相依護究須用何項新式又定遠鎮遠兩艦在德定購英人頗滋疑怨添購快船似以英廠爲妥均希詳酌撮要電復爲幸北洋水師人才太少學堂甫設練船必須添備欲購合式夾板船各口甚少拍賣卽有亦貴約二三萬金電

請尊處代爲留意或購現成或定做交商運貨來津留用尤便乞酌之昨奉七月初五日第七十九號手書慰悉種種應復各節條列如左

一六月二十九日電信舛錯太甚已飭電局報查

一魚雷教習果定派凱爾否雷橋浮埠應建何處自須俟教習到後相度妥商脩雷廠儲雷棧必不可少蒙訂全廠器具已付價三之一試雷急需者限三月造竣務早日起運亦俟教習度定地址興建應與雷橋相近一鑄銅鍊法既准傳授執事一人自可預付五十六尾之定銀十六萬一千三百馬昨已電致付定習法四字並加滿第三批字諒可照辦凡配料下爐看火鍊鍊等法望費心習學務得其祕以銅質不爽爲度中國既有學生匠首在廠習製各件再得鍊銅之法即可製全雷不必於百尾外添購用之不窮將來可令王筱雲專辦此事斷不令洩漏於人

一定遠所帶次等魚雷二艇須速率十五海里半鑽遠附帶之百尺魚雷

二艇已否訂定定遠九月下旬工竣諒可尅日起旋望電示北河十月二十外卽凍封似年底不便至大沽須明春驚蟄開河後乃可抵沽口派員接收並預籌議布知海部派人代送能少緩待否該廠既須保固派人在華接管滿期可無庸再糜保險巨費昨已電商上年碰快船來華赫德欲保險鄙人與丁提督葛雷森商定不允彼船小猶平穩況鐵艦之大又有德員駕駛者耶

一新式恩得生之電燈訂價三萬六百餘馬合銀五千九百六十餘兩定遠鎮遠艦內均宜購用惟電機器具須令前去員弁演習其法庶德弁同後可以運掉自如將來訂製快船內此項電燈魚雷甯連珠礮皆不可少之要件也

一此間擬訂請英水師副將名歸者幫同丁提督教習總查北洋各兵船即副將船學甚精歷練亦多人頗勤能知念併及徐仲虎自接兩次咨查

頗自悔其失言幸勿計較坦然處之

九月二十八日復黎召民京卿

海上如練成大枝水軍益以鐵艦快船數舫南略西貢印度東臨日本朝鮮聲威及遠自鎔覲觀潛消鄙人竊有志焉願執事之力贊其成也承示估算快船工料價值較赫德所呈新式快船康邦機器二副合五千馬力每點鐘行十七海里者少差噸重二十七噸此則大噸僅重十噸然彼索價至六十餘萬此則船噸約估共三十九萬二千兩耳再四籌維似以省費合用爲是鄙意北洋須添造快船兩隻尊處現造之船春初準可下水否再行續造約計購料鳩工何時可以告竣又快船圖式乞先摹示一分以備參考爲幸倭兵駐王京護使館者尙有數百故敝處水陸各營派往朝鮮未能遽撤以相牽制亟須運船一隻以便海道往來解送聞永保琛航各船議准搭客收取船費貼補月不過數十金仍屬無濟敢乞移緩就

急酌撥琛航北來應用封河後卽赴煙臺亦甚便也續到學生已交丁提督上船練習屈計碰快船及明春第一號鐵艦到後尙有不敷調遣之勢懇勿撥回另於舊班學生中留意挑選以供快船之需

十二月十六日復周筱棠京兆

權佐司農望實並茂惟譯署筆舌愈煩責任過重若卽真除卿貳免以地方政事分心尙可力爲其難第自開辦洋務以後皆 樞垣首輔到署主持弟去秋在京曾爲恭邸蘭翁力言之邸謂苦勸不行蘭謂習氣過重難於著手其實才短口訥不欲上前耳近聞有欲調晉帥入主此席似係一人私見廣虞曾面言其不可輕重緩急機宜非於斯事素有歷練恐至僨或誤邸病假銷後再商措置也巴使舉動橫甚聞明春卽將回國故恐睢遏忿以償土貨改造之願該國外部必不謂然自宜堅持定見力與磋商迫其病歸亦卽了事法越之事春間廣虞過商料必以滇境准其通商

爲結局廣翁謂若如在滇越之交覓一碼頭爲安今實使指稱保勝正與我輩私議相符然法人未必不欲我藉此移動劉永福而劉永福亦非中國所能移也嗣閱岑彥翁鈔摺唐炯建議可許入滇通商果爾則更無須此周折且看滇中覆奏何如法越原約已認法爲保護今議北圻分界保護法人因我之屬國相讓但恐滇粵自度力量未肯多認一時難於定議耳英商設線務望堅執不准上岸原議冀可廢然思返薦寶之疏鄙人不管疆事似應暫置勿論令叔裁五觀察在皖籌辦工賑極費心力而該處官場不免嫉忌壽翁或有以酬勞凍文數奇近日中風頗劇恐將半體麻木奈何令舅氏虧案前已減屬品蓮和盤托出及早妥結再得尊函示意當更無疑能於執事任內幹旋尤妙但須詳告以寄籍也何天爵在此總擾滬案日不暇給

十二月十八日復張蕡齋署副憲

前聞流言卽是公會避席惡聲憎影之類甚謂酒肆歌業街市蕭條皆言
路擊射太過世態浮薄可厭公乃招忌之尤叨在心交不敢不告來教抑
然自下佩服莫名法越之約義何能諉屈計此事議論正長區畫極難周
妥法已觀越爲囊中物我出而牽制之總以永不吞滅爲要義保護之界
過多卽彼可允從滇粵之力豈能長守境外稍有蠢動則實言旋至此界
務之難也岑唐諸公稔知通商不能深入且前已許英不便獨斬法人而
內意似不甚以商務爲然故彼欲在保勝我不置辨且滇議若何鄂生
擬專賴劉永福禦敵法之調兵專爲永福孤注其何能久支不移永福則
通商雖許而實未許法必加兵且爲邊患此商務之難也其中糾結頗多
恐非剋日集議三月葬期已近私衷惶急頃已具疏預請 賞假實萬不
容已之苦情若過期事猶未了當越紆以從也前致振公以鞠躬盡瘁相
實望來書仍謂必得請乃已欲敝處設法留仲良真不解事仲良才力雖

健絕不肯作此替人奉豎鄙人所敢僂言哉鈞臺本有陳情之意聞潮信未知若何亮生適感寒疾屬其勉赴斯役渠恐與定夫意見不甚合又慮鄉宦客官與主人有參差耳頃閱邸鈔鄂案已結家兄篤老已無宦情惟平生孝友忠愛遠近尙無閒言太沖報復微嫌必欲深文周內若非聖明俯鑒樞輔幹旋何能稍留體面殊令感激涕零不知所報楊道人極忠厚亦無實在證狀以此見朝廷賞罰之公平矣

十二月二十日致左相

創造機器織布之始因徇紳商公稟請委龔道壽圖駐局專辦官務弟雖不深知龔道伊兄現任廣東臬司易圖曾切實面保似非毫無根柢者不料其稟許王克明等濟賊漏稅訊屬子虛既有此番形跡誠如尊示久留織局慮其終不相宜該道係蘇省屬員貴處尙不逕撤恐致外人造言簸弄何德愈高而心愈下耶已遵照大咨檄飭龔道另候差委毋庸會辦織

布局務並咨覆冰案矣。總局爲洋人所忌嫉，而中國必須籌辦，仍賴大力主持保護。期於必成，否則各商聞而解體，事或中輟，尤爲中外所竊笑也。洋商紡紗公司並未停止總署，雖極力辨爭，各使以條約工作二字狡賴已辦者，恐難諭禁，但能杜漸防微，勿任以機器推廣製造各種土貨，庶可保華商利源耳。

十二月二十四日復倪豹岑中丞

滇粵之出師也，名爲防備土匪，實欲牽制法人。保我邊境，是隱然自認保護之意。今法越相持日久，不下法廷議院，必欲添兵益餉，以圖一逞。劉永福終難孤注，若中國不復通問，恐其乘勝席卷北圻，邊境亦有唇齒之患。法使寶海欲從中調停，實無他意。故譯署與敝處因所請而允爲會商，乃爲息事甯人經久之計。譯署迭函及臘月初十日，寄諭奉到，想尊處必妥細籌覆矣。保勝爲通商總口，是否相宜，應由滇省主政核復。則劉永福

如何安置滇中當一併籌及彼所駐扼實當滇邊門戶也粵西祗應度量情勢能保護至越南何省何處爲止耳法人並未求與粵西通商則商務非粵所應管也論越爲中華屬國全境皆應歸中國保護此乃泰西通例然中國自古朝貢之邦不攙與其內政更無保護明文今越之南圻早爲法有駸駸蠶食而北若不趁此時劃定鴻溝設竟擾及邊界或如英之於印度暹羅緬甸等處廣占內地爲患益長及今明立限制邊疆可期永固而越土不至如琉球之賴越之利亦中國之利也至尊慮異日或有要挾背盟之事我當專受其責此亦不可不防意者但以近邊某處至某處爲保護之界繪圖貼說由驛署轉交會議大臣與法使商辦可乎法已續調水陸兵若干至西貢專俟明春會商中國定界後彼兵但派往所應巡防界內保護紅江通商蓋同治十三年法越定約由紅江通商而久爲劉永福所阻決不甘心執事切勿誤認此語爲彼族恫喝其咎固在越不在法

也弟不欲與聞茲事無如譯署委令寶使赴津總擾事關中外大局復何
所諉頃以營葬期近預請假歸奉 旨明正二月再定蓋寶使候該國來
文正月可到必將 特派會商僑漢粵豫有成議法使不大費唇舌或可
剋期定約尙不誤三月啓鑾負土之願則公私兼盡矣執事超擢專圻正
隆倚畀自應勉爲其難何得遽萌退志皖鄉賑捐極蒙鳩助高誼可欽

李文忠公朋僚函稿篇目

桐城吳汝綸編輯

卷第二十四

正月七日復張蕢齋署副憲

光緒九年

正月十四日復吳清卿節帥

光緒九年

三月十六日復左相

光緒九年

三月十九日復左相

光緒九年

四月五日復左相

光緒九年

五月四日復左相

光緒九年

五月五日復張香濤中丞

光緒九年

五月十六日復左相

光緒九年

五月二十日復張蕢齋署副憲

光緒九年

六月十三日復周筱棠京兆

光緒九年

九月三日復吳筱軒軍門

光緒九年

九月十二日復張香濤中丞

光緒九年

九月二十四日復丁稚璜宮保

光緒九年

十月十五日復彭雪琴尙書

光緒九年

十月二十日復劉涪卿

光緒九年

十二月十二日復翁叔平宮保

光緒九年

十二月十五日致李蘭孫中堂

光緒九年

十二月二十八日復張香濤中丞

光緒九年

四月三十日復左相

光緒十年

五月五日復岑彥卿保宮

光緒十年

五月九日復曾沅甫宮保

光緒十年

閏月二十四日復許星叔少司寇

光緒十年

六月一日致曾沅浦宮保

光緒十年

六月六日復張樵野京卿

光緒十年

六月九日復周筱棠京兆

光緒十年

十二月六日復吳清卿副憲

光緒十年

三月五日致徐孫麒星使

光緒十一年

五月四日復許竹筠欽使

光緒十一年

五月二十八日致總辦朝鮮通商事務陳芑南觀察

光緒十一年

八月九日致日本參議伊藤春畝

光緒十一年

九月二十九日復崧鎮青漕帥

光緒十一年

十月五日復曾沅浦宮保

光緒十一年

十月二十五日復崧鎮青漕帥

光緒十一年

十一月十二日復張朗齋中丞

光緒十一年

十二月九日復曾劼剛襲侯

光緒十一年

十二月十三日復丁稚璜宮保

光緒十一年

正月十六日復曾劼剛襲侯

光緒十二年

五月十二日復曾劼剛襲侯

光緒十二年

五月二十日復曾劼剛襲侯

光緒十二年

五月二十二日復醕邸

光緒十二年

七月二十日復吳薇隱觀察

光緒十二年

九月二十二日復徐孫麒星使

光緒十二年

李文忠公朋僚函稿卷第二十四篇目終

李文忠公朋僚函稿卷第二十四

桐城吳汝綸編輯

正月七日復張蕡齋署副憲

光緒九年

法人兵力不足取劉之說毋乃視劉永福太重而量法太輕爲一丟里斯
小國耳地天屬土法遣水陸攻戰數年必滅之乃已劉則土寇伎倆耳粵捻之
役凡土寇聚結山谷者無不被賊攻陷粵捻尙無根之賊法自恃強豈肯
終爲劉所阻且同治十三年越王與法定約通商紅江而劉獨持之若能
永遠支柱中國亦願藉固邊防去冬法廷正議大舉實使恐與中國生衅
從旁調停故鄙人迎其機而導之尤再會議至分界通商如何議辦仍請
滇粵自行酌定屆時妥商實非一味愼惹也尊論爭界則必扼北圻之隘
彼南我北各據一隅試問滇桂兵力餉力能遠略久支否旣與強國爲敵
人材果孰主張耶通商則必設西貢之官夫西貢久爲異域其魄力幾在

香港之上香港尙不准我設領事卽彼准設亦不過如出使各國聽人主持我之兵船陸軍力量皆不能及庸有濟乎此事總須參酌時勢大局而後定議未可徒逞氣矜之隆卽照滇桂所擬尙恐不能成議若如尊論徒增波折終無結束遂於 國計邊籌有裨萬萬不敢信也僕將行之人本不應與斯議過承敦勗敢布區區之誠蕤齋新議欲徇封貢虛名無當事理駁之極是家兄事極蒙關照感不去懷仲良嫉惡最嚴豈有自染烟癖之理議者誣罔殊不近情東平指日銷假當有措置

正月十四日復吳清卿節帥

慶源會甯變通互市章程大致均甚周妥惟朝鮮旣派魚允中於四月杪前往會勘此係兩國議訂之事須交朝員閱看商定恐屆時彼此尙行添改未便遽以入告彭部郎亦應由鼎帥主稿會奏派往昨已咨覆冰案並泐公函奉商矣將來定章以後若令彭部郎駐會甯等處經理商務所需

經費似可酌照日本理事之例於出使經費內提支查日本駐神戶長崎理事月各支薪水銀三百兩通事公役等項工食月各支銀四十兩應否核減若干抑照原數聲請俟章程議定後由鼎帥執事詳細酌擬咨由敝處核奏奉省同一變通互市而文山將軍奏咨擬在中江交界地方設卡並未遣員往駐朝境或不至按照且瀋陽財力較裕亦不似吉省之窘乏總署當可議准也俄人侵佔琿春之黑頂子設兵招墾近在圖門江邊若不索還俄界竟與朝鮮接壤後患殊多執事與俄官訂定三月照圖派員會勘交還或無中幾秋亭頃當赴琿籌商朝民祇可任其遷入俄境魚允中到時應屬秋亭勸其不必向俄人收還或俟俄朝議約後再作區畫耳鴻章負土未成年前請假營葬奉 旨正二月再議目下法越會議之舉尙無端倪少遲當再申前請春仲冀卽南歸也

三月十六日復左相

日前假旋急欲赴先慈小祥几筵晝夜趨程二十五夜四鼓過石頭城邊未及停棹脩謁頃奉十一日手示敬承一一英國大東公司電線必欲與丹國大北一律上岸實與同治九年原議相背總署與敝處力拒其請正與尊意相符嗣劄剛迭次電商通融謂與現議洋藥加稅有益總署臧屬轉飭陸電華公司與英商相機妥議昨聞已訂合同未知英廷有無更改勅候設餌之說用意雖是惟電線利微烟稅利大以四兩博千金未必遂有把握承示致總署臧放輕電線歸重稅釐其中大有機權第威妥瑪點槍萬分恐仍不上釣耳越南前請招商局輪船包運漕糧茲法人與越構兵又攻陷南定遂將商局所儲越糧查封蓋欲挾以圖越非與中國失和也然法國自春初外部易人因寶使擬與中國會議越事竟將該使撤回意殊叵測越南忽諸亦吾華肘腋之患聞已有旨令粵西徐方伯延旭出境布置此事如何結局尙望蓋籌及之潘鏡如在粵襄辦製造有年但

粵東局面甚小不若滬甯規模之宏果有以善其後否李冕林操守端潔情形尙熟能否飭留百日後視事敬祈卓裁吳提督宏洛久在張振軒劉省三軍中張劉極稱其能戰適該營幫帶吳開勝來此祭奠面詢備細據稱二月間營勇並未鼓譟似是曹肯堂所部之事至鈔單各項內號衣戰裙寒衣扣銀代製淮部各營向章皆同緣恐由勇自製未能一色整齊其新勇入棚扣算接收號衣等項之價非另行剋扣入己也發米已改照時價扣餉挑河賞號均由營官照數分給並無分文未發等情所言是否確實尙希遴派公正妥員查究如有剋扣實據應請酌予參撤該部五營本係樹軍繼歸銘軍吳宏洛係原募之人資望較深接統似難得妥員也弟同家兄等經營窳窳少贖重愆他日出山再趨詣節轅一傾積愫

三月十九日復左相

上年法越啓衅曾奉 寄諭飭調閩粵兵輪交吳全美帶赴瓊州駐泊游

奕交廣界上以壯聲援當由船政大臣與粵帥商調輪舶四隻前往祇可稍作聲勢未足遽當大敵南北洋水師甚單似難遠役是以今春越南王派員赴津乞派舟師防護該國都城無以應之見在法人進占河內南定均係沿海內河地方輪舟便於出入若由河內循紅江而上卽爲越之北折山險叢雜法兵尙單似難深入 廷旨已令滇粵各軍相機進紮又由總署電屬勅剛責問法廷因何梗議動兵或者懾我先聲漸歸和局鴻章在津時所聞 廟謨大略如此未知以後作何布置越之疲弱與朝鮮等而同治甲戌與法訂約背謬已甚又未能一一遵辦法人所以興問罪之師將來調停亦大不易也

四月五日復左相

奉三月二十四日手示以上海織布局擬請推廣紡紗恐洋人藉口絮聒商令緩辦思深慮遠欽佩莫名洋商紡紗機局如已停止自應批駁免啓

爭端若洋局並未遵停紡紗專爲織布之用或尙可以間執其口鴻章前
奉 寄諭催回署任昨又奉 派督辦越南事宜材輕任鉅如何能勝
諭旨應調何路兵勇著妥籌具奏查防禦法兵應撥熟習洋槍礮之隊敝
部淮軍向練後膛槍礮擬調唐提督定奎吳宏洛所部十五營現駐天津
劉盛休銘軍十營該軍等皆係劉省三舊部戰陣得力可合可分昨准大
咨尊處亦經奉 旨籌撥務乞移緩就急慨允暫行借用江左勁旅如雲
似尙不難酌抽填紮江陰礮臺本無須五千人之多但有五六營替防可
無他慮弟將家事檢料稍畢便卽啓行屆時並懇賜借小輪船入湖拖帶
再謁晤面商一切

五月四日復左相

前趨謁飫領雄談醉酒飽德拜別後忽忽乘輪晤石泉漕帥於下關暢敘
契闊殊歎相見之晚頃奉四月二十九日手書鈔示總署彙錄劄侯電報

此間亦早奉到軍情旦夕變遷四月十三法兵進攻中越官劉永福之伏
殲斃總兵以次九十餘人電報法廷舉國大憤連日接電稱已添派鐵甲
及兵船四隻陸軍三千赴越議院准添兵費不限數目將圖大舉報復劾
侯適赴俄賀升冕總署奏奉 旨派令與法廷專議越事劄電堅辭但請
邊軍混入越兵暗助前日之戰似卽如此辦法若號召大軍聲罪致討顯
露開衅之象亦非 朝廷本意法新使脫利古前使寶海同時抵滬所議
斷難就範擬再相機觀變穩慎圖之籌調營勇一節現密飭淮部添備槍
礮加勁操練以俟調發隨時電商總署酌定進止如須明與法人爲難餉
事一惟我公是賴乞勿推諉是幸

五月五日復張香濤中丞

手教並頒聯幃拳拳風誼矜恤良厚李鎮相遇於巢湖舟次當卽挈令赴
滬詢悉蓋躬過勞夜以繼日目前庶政就理歲豐人和宜稍稍節蓄精神

以爲遣大投艱之用海內人才虛耗極矣一有警變不知如何支撐如公之年力學識真未易數數親耳鴻章將弱無似屢更事變志趣益復頽唐於軍國大政無所裨補昨歸負土方擬續假閉廬藉以藏拙補過屬以越南事棘疊奉 廷旨催迫上道義無可辭往者日人之開朝鮮赴機宜速今者法人之圖越南調發宜緩蓋敵勢有強弱事理有糾葛也到滬後兩晤法國新使據稱法越自甲戌立約後明認越爲自主之國不得復爲中華屬邦昨因劉永福戰敗法軍國人大憤議院添撥兵費遣水陸分批東下必欲得而甘心詢明中國或明幫或暗助卽將失和等語頃已電達總署請轉奏以定進止 內意初不過虛聲恫喝冀法人斂兵復歸於和豈知法廷蓄意吞併在十年以前一旦小挫使有藉口竟無調停轉圜之策各省海防兵單餉匱水師亦未練成一發難收則決裂固意中事也法事與上年俄事又異俄皇垂髫持盈保泰機有可乘法爲德挫十餘年養精

蓄銳欲藉屏小以逞強貪利恐中土未易與爭鋒上下力圖自彊生聚教訓庶有振奮之一日耳

五月十六日復左相

粵西出境兵七千餘有徐方伯督統雲南出境兵六千餘有唐方伯督統足爲越軍劉永福聲援法軍在河內南定者固守待援計六七月間援師陸續可至儻越軍再接再厲勢必不能深入日來勛侯電報亦有紳會漸咎法廷開衅之語越事似有轉機前奉初二日 密旨飭鴻章速回天津比因布置未定復疏上陳以待 後命再取進止導農闢青兩軍本已面允隨征惟南行現未定局似宜少緩調募卽舊部淮軍亦未便遽爾檄調也滇粵邊境河道甚少水雷無甚用處上年滇中奏撥槍礮至今尙未專員領取可否派員迅速解往尙希卓裁承允代濟餉需篤秉公忠欽感無似埃續奉 廷旨當再奉聞

五月二十日復張贊齋署副憲

法之蓄志圖越已數十年 中朝向置不問至上年形象大著始與力爭其何能及今又倉卒而起不才於禮廬隻手空拳不知所以爲計若以淮部尙有兩萬則現駐要防豈易抽調若以鄙人素尙知兵則白頭戎邊未免以珠彈雀樞府調度如此輕率殊爲寒心聞有諸格靖南征者此老模糊顛倒爲江左官民所厭若移置散地固得矣然夷情大局愴然必有能發不能收之日事局方長尊論選邊才儲戎備則經久不易之策耳鄙疏昨亦稍稍及之如蒙 交議或得寓目惟目今人才彫瘁將材邊材祗宜節取其長於愛護之中加以磨勵求全責備則無能勝任者矣越王老悖無後無可久存之理河內以南斷非我力所能圖存將來能照寶議劃存北圻近邊一帶已爲幸事滇商不得不通究之通商非病通商而辦理不得人則禍機潛伏也桂險而瘠實非彼族所垂涎敢保永遠無失尊慮滇

桂去而天下不可問危言悚聽無當事情期期不敢諾也粵防宜用粵人但須統以淮湘之將乃漸束以紀律顧少留意鄙人爲局外浮言所困行止未能自決仍候 中旨遵辦局外論事事後論人大都務從苛刻孤忠耿耿祇自喻耳蓉江事前已面屬鄂員轉商兩院將增付運腳六千兩巡解津轅發道作爲油艖之用勿令胡道經手易帥後未知允否壽翁迄未到滬當再商之

六月十三日復周筱棠京兆

法越近情迭詳電函可勿瀆陳築室道謀固無裨於機要懸想此事結局實屬難之又難楊越翰密告脫使接該國密電將來賠款兵費須著落中國代償稍一進兵勢必惹禍上身無論屬邦名分離存且有糾纏不了之日劫剛自春徂夏電報似因法廷不理多爲憤激之談而所擬新報解散各國勸說茫如捕風但冀秋後法兵進攻仍不甚得手或者廢而思返我

可乘機轉圜是則徵天之幸目前脫利古即使北來斷無成議其狡悍實倍於尋常也鴻章甫拂征塵遽膺兼權督篆之命縹然弁綬豈堪蹈此咎戾頃已專疏瀝辭

九月三日復吳筱軒軍門

接六月二十九日惠書商及暫留二營駐朝餘卽移回煙臺以顧東防等因此事關係頗鉅躊躇月餘難遽定計久未作答八月二十六日張哨官寶到中秋日來書復諄諄以孤軍遠戍易致流言爲慮而於朝鮮近日情事概未詳及接晤張哨詢悉軍政嚴肅勦履綏和爲慰法越搆兵日久未解七月杪法人與劉永福戰爭北圻不利調兵船另攻順化都城脅定新約十三條盡攘其兵權利權及用人之權並願將全國歸法保護越王名號土地雖存固已陰降於法僅劉永福所部力與相持我滇桂各軍進紮越之北甯山西與劉犄角援應殊非常局法使昨來津赴京會議求我助

剿劉團或退兵分界均未能許法亦有進退狼狽之勢聲稱仍添兵攻劉或因我暗助劉另派兵船來擾沿海地方均難必其無事以愚意揣之彼於劉團勢難中止或遇我邊兵交綏勝負尙不可知必不肯遽爾入華開衅致擾亂各口各國通商大局 內意不無震動迭 飭彭雪琴赴粵東會辦防務調吳清卿帶吉勇三千來津協防並有如事勢緊急卽調貴部回津著鄙人妥籌辦理之說鄙見此時布置總以鎮靜爲貴屈指兩月內北河封凍法兵船皆在越南尙無移往粵閩大隊豈敢違犯北洋且聞朝鮮君臣趨向不定時時探詢越事似觀望以爲向背者大軍薺留鎮懾不可輕率舉動致令屬藩藐視況太公黨誅索正急民情搗貳僅麾下舉足內渡彼間又起波瀾將若之何似目前宜靜而不宜動津防各軍訓練精強卽使法船來擾當可力遏兇鋒至煙臺雖甚空虛卽貴部全來亦未便守口或祇可近紮後路無大神益也尊慮遠近訛傳市言成虎申報日報

所稱多係倭人嫉忌及朝人附日者捏造識者皆能鑒之無足計校張幼樵六月間疏陳執事難於持久必不能銳然以朝事自任請飭敝處別選賢能等語敝部能任邊事者尙有賢能逾於麾下簡練逾於貴軍者耶是以迄今尙未復奏亦未轉行第念軍士久戍異域艱苦萬狀豈能一日忽置於懷擬俟明春開河後望台旆乘輪來津妥商進止或留二營駐守責成妥員而麾下先統四營回駐威海衛現操魚雷處所妥籌布置與水師相爲依附尙可立足威海衛亦足扼煙臺之吭尊意以爲何如朝鮮新練二營既有成效應否預擇漢將會統爲脫卸地步日本兵約定期年撤回已否抽撤竹添所言免西人挑畔敗中日之好殊非確論彼兵未撤我軍尤未便全撤竹使僞尙在朝晤時可與要約幸勿盡洩情實於彼耳振帥帶吳宏洛五營赴粵籌防頗露張皇之象其實法人未必真有窺擾徒令雪帥前往牽掣甚無謂也鄙人駐津度歲照料防務音問可以常通

九月十二日復張香濤中丞

都司賈吉齡在熱河帶隊恩都護李軍門迭函諄留弟以尊處需材孔亟促之西行昨過津面稟十年未經歸省求便道南宮原籍小住旬日卽啓程比想已由籍遄征其人老於戎行而濬於榮利近頗習靜悟道未知尙能振作精神爲左右奮力馳驅否洋軍火頭批計已解到二批本擬交賈都司領解因渠不便逕往如李鎮先義復回可卽交解格林礮購到容卽飭撥籌辦旗兵屯墾原爲本計遠圖直省情形與晉略同亦擬請作罷論津沽新開水田千頃防營歲費資本甚巨開河濬渠多由勇丁力作旗兵習於偷惰勢難強行吏部新改選章實多窒礙大疏已交議如能變通各省受惠不少頃已飭司妥酌議詳剋日具奏或可趕入併議至州縣丁憂起復仍歸原省恐格於成例未易更移滬上文報已飭滬津文報局速遞承詢法越之事所聞法船赴粵要素及兵船至津沽皆係月前謠言法使

來津議分界通商各節未就復往京未議而歸國彼自恃脅越已立新約
僅劉團未下似無多求於中國者申報所傳法越約稿未詳昨見晉源洋
報譯本鈔呈台覽雖未盡確當已得其大概英使居間法亦不願畢士馬
謂德國調停有損無益彼固以持盈保泰爲心未肯因人受累也昨南中
電傳法帥喉越與劉議和劉已退回山西未知確否劫剛來電法廷仍聳
議紳籌款添兵蓋劉不與和冬春法必進戰劉若暗和我軍尤宜防備至
與華開衅未必實有其事粵民焚洋房可徐就理烏合之衆恐不足當勁
敵清卿奉 旨帶吉勇三千聽候調撥封河前當到再商屯駐之所看來
越事實未易就範剛柔均難結束執事目營八表何以教之蕢齊西去不
便通問尊處常有消息否另詢鐵礦一節晉礦甲於天下惟土法不精運
道多阻是以遠商裹足前商局議用機器開鐵路卽如尊旨由平定至小
範四百餘里鑿山架橋連開礦工本計需千萬以外華商斷無此財力若

借洋債更駭聽聞近因法越事久不定謠惑甚多滬粵市面大壞殷商歇業集股無資唐景星今春往西洋探探礦務商務約歲杪乃回埃與籌商或令開平礦師就近赴晉勘視稟請示遵鑄鐵機器鍋爐均極笨重似不得過四天門至銘鍊成鋼陸運出境尙可將就但恐先不能仿洋法烹煉耳敢貢所知以備決擇

九月二十四日復丁稚璜宮保

鴻章春暮假旋營葬嗣奉 詔督師越南倉猝成行駐滬彌月疏陳法人圖越已三十餘年動關全局祇可令滇粵各帥藉防邊爲名出師協守以固吾圉未便號召客軍大舉深入致成兵連禍結之象旋即迭奉 密諭迅回北洋復令兼權畿篆以不祥之身謬膺艱巨必召禍殃屢辭不獲而大水又至矣竭蹶經營昕夕鈔暇負咎萬端捧閱手示似精采少遜往時所謂手輒神罷殆非虛語時艱日棘人才益孤惟賴三數君子分布海內

支持危局明公才望識力軼羣絕倫老於邊陲猶非鄙人所願此身關係至重衰年病後以培補元氣爲要務祈稍節憂勞勉進補劑勦力仔肩萬無可退之日麟祝之餘彌殷悵系法人脅越訂新約二十七條盡攘其兵權利權及用人之權越更不可爲國劉永福雖尙能戰法又挾越王以制之勢成孤注恐非常局滇軍先得地勢舒卷自如惟粵軍近臨河內徐曉山蹈厲無前既不能爲越恢復將如羝羊觸藩深可危慮法使來津京恃越有成約不少俯就勦剛在巴黎屢議屢翻亦復無能爲力此事正不知如何結束耳 中朝若必爭屬土彼常有南犯粵東北闔津門之謠大約沿海防務一二年間總不可鬆勁蒙允籌濟淮餉不稍短解公忠厚誼欽感奚涯

十月十五日復彭雪琴尙書

夏間滬濱捧袂暢聆蘭言別後南北分攜馳思不置聞奉赴粵會辦防務

之旨正系遠懷月之七日接讀重九夜手示娓娓數千言忠義勃發擬
卽單騎入粵先聲所播敵膽已寒調撥合字湘營及王道之春所部聞有
寄諭飭左相照撥並源源濟餉諒無可辭頃江南人來詢稱該營尙未
起程豈尙靳而不予耶季老每謂粵可籌餉王朗青赴越南之營且欲指
粵捐接濟皆誤於梁檀甫臆度之詞粵雖富庶而紳商志趣不一風鶴多
驚尤虞紛擾若指捐輸濟餉恐望梅未可止渴必賴江左協濟原餉庶無
後艱粵人不乏勇悍可助聲勢若如公言按陸軍規制操練嚴明紀律似
亦未易辦到振帥抵任後已略有布置得我公振臂一呼同心共濟當可
不戰屈人幸勿過焦急也沙面燬洋房之案尙未辦結各國紛紛猜疑日
有謠譏目前須鎮壓民心勿令妄動免致因風生火總署現商英德法美
公派一員會同華員查辦燬失房貨秉公議賠此案辦了先解彼族黨羽
再與法人專理越事庶頭緒不亂而弊端亦不至多開執事報起程籌辦

大略一疏月初已到政府諸公當早鑒悉目下駐節何處規畫奚似望隨時詳晰示知以慰企念弟謬權畿篆兼顧海防任重才輕時虞顛蹶所盼粵洋障此狂瀾使不北趨輒生可藉藏拙耳

十月二十日復劉溶卿

現辦八年分奏銷實存銀一百六十餘萬茲核尊示九月庫存三十二萬有奇銀錢所是月報存八十二萬有奇九月內報解在途者不知幾批若僅二十六日十萬一批未到共祇一百二十萬零卽連上年提存津所三十萬計之尙不及奏銷實存之數究係因何舛誤望與銀錢所通盤覈算見示爲幸在部中見淮軍存款如是之多方詫餉源富足不知各營預借太多如津所存銀八十二萬之內各軍借墊米價馬乾二十九萬零代放武毅慶軍又八萬零僅存四十四萬有奇耳揚局想亦有借墊之款若兩處常有存銀百五六十萬亦足備緩急不時之需矣況現增武毅粵餉盛

軍補足二成等款誠慮來日大難海上若有警變滬湘入款更不可靠然籌防喫緊之際若遇閩不加一關恐無以維繫軍心各軍照加赴粵五營斷不能於已加一關之外再加也湖北善後局已決意停解無可如何漢關切勿放鬆各督銷局務望隨時加緊商催爲幸廬城王謙齋尙辰苦求幫助祈於閒款內歲寄百金以調其乏不能多也

十二月十二日復翁叔平宮保

鴻章憂患餘生適遘時艱謬權鉅任無所裨補悚疚萬分越事之興尙冀迎刃而解息事甯人今則局勢屢更彼此皆騎虎難下自不得不堅持以待機會然岑徐皆非能了事者仍在樞軸之相時操縱耳若僅在越地鑒兵利鈍無甚關係波及內地則各省強弱不齊民窮財匱實大可虞幼樵英銳無匹曾叩以將來結局若何固亦茫無把握我公憂國如家知必長慮卻顧也

十二月十五日致李蘭孫中堂

日前幼樵來晤詢悉碩畫盡勤忠誠蹇蹇欽跂莫名鴻章於越事初不敢
力主進取實見得各省戎備未盡精整或至一發難收今山西挫退敵餒
正張我軍已紮北甯洵如尊旨祇有增軍繕備壹意堅持以待事機之轉
黃桂蘭在淮部中向稱能守如糧械應手似可堅忍擋拒彥卿招集新軍
憑恃險阻尙可自立若令深入鏖戰恐無把握法人志在略地通商無厭
兵自退之理其於劫剛猜嫌已深又難在巴黎講解此事將來如何收局
仍不免重費紆籌耳清卿練軍簡器實力講求堪膺疆寄似未便久置邊
隅希將軍於兵事茫然能否遴員往助尙希卓裁鴻章謬權艱鉅適遭水
災籌賑籌防竭蹶無似設有外侮勉督將士力圖捍衛以祈仰答 宵旰
勿貽知己羞而已

十二月二十八日復張香濤中丞

唐景星頃已回滬聞約有西洋礦師東來埃開河北上當與商遣開平係煤師非開鐵好手津滬廣鼎更多不敢濫薦爾即亦擬於西山齋堂等處開煤鐵礦屬景星物色礦師但無股本事必難成平定距直尙近四天門既成坦蕩機器或能拆運容有善相者當資之入山以副諄屬海禁雖開必得鐵好價廉與洋產相埒乃可暢銷頃因製粗器飭局員在津市購晉鐵據稱較洋鐵並不賤豈陸運費本耶蓋洋鐵方圓大小板條恰如人意不獨質地純淨也晉軍先用前門槍俟操熟再購後膛此不易之法近幼樵在總署商令敝處代購克虜卜過山礮百尊哈乞開思毛瑟槍各五千枝以備海防邊防各省借撥繳價惟皆極精緻之品有器而不善用與無器等振軒電稱粵將尙不知操用洋軍火何論滇桂恐各省大率類此遽與西兵敵利鈍殊無把握耳鄧光華開銅礦如有股可集自應試辦越事蒙舉數條見詢謹罄所知以對

一振帥以省防自任故有雪老屯瓊之議以分責任嗣長將軍等電請留雪帥駐省僅撥王之春楚勇二營駐瓊尊論省城穩固敵雖襲瓊必能逐而去之是重視彭而輕視法恐彭張無此力量 內意既不欲彭遠去自應緩圖瓊防

一道員總兵以上有可屬大事而未見用者鄙意竟少愜心貴當之人空疏可愧大潛才氣陵轢一切但不欲輕出所部散在南北若調集則餉不應手時事艱棘彼固深知不易強起

一閩中已 特召厚庵未知行止若何臺灣劉道能辦土匪軍事布置未聞方略

一旅順礮臺一座甫成宋軍添募四營有警則斂快船入口水陸相依聊資控扼不敢謂足恃也

一法外部於劾侯璉畔已深其言格格不入渠常駐倫敦固非得已法又

不肯派專使來華相持日久如何了局

一英美日各邦果至法船深入似應申明公法局外不得接濟目下尙非其時

一岑彥帥月內可抵興化法軍聲言進圖北甯似尙圍而未攻且俟新兵添到看其如何舉動此時山北以南均爲法人堅守無論滇桂皆不能逕達順化

一清卿所部操練洋器甚精頗思及鋒而試未聞有東歸者見籌議吉防替人尙未覆奏

再奉另示以船事殷殷稱謝愧悚莫名聞鄂局諸道初頗作梗嗣經敝處批咨亦遂遵辦頃接唐廷樞電復呈覽西洋鐵礦師三年辛俸來回水腳須二萬金若由尊處專用卽令發電往邀否則僅察勘可否大辦似不值先糜巨款或屆時令開平礦師往勘乞酌示

四月三十日復左相

光緒十年

前稔 溫詔趨 朝正深欣盼頃奉惠示敬悉蒲輪就道清江至濟一水可通僅濟甯至德州陸路五站由德至津下水八站於高年調攝較宜弟卽預令長龍坐船往德州迎候鈞駕並派流馬小輪船泝流上駛以備沿途拖帶惟查衛河水涸之際深淺不一小輪喫水略深向未至德當能在滄州以上探水前進伺接行程舊雨重逢蘭言快挹尙祈在津盤桓數日俾得飫聆教益由津達通水程不過三日也

五月五日復岑彥卿宮保

此次議款之速實因桂滇各軍潰退越事已無可爲法提督調集兵船欲攻奪臺灣雞籠煤礦福州船廠接濟煤械爲持久索費計正慮兵連禍結益難收拾 中旨密令鄙人維持和局乃敢冒不韙以成議解此困厄而局外清議挑斥多端夏間法另派正使巴德諾由越來議詳細款目必有

饒舌然鴻章必任勞任謗不肯遽與決裂福使密告閩月間當往保勝剿
逐劉永福茲大疏令黑旗分紮大灘目下暑瘴正盛大灘以上小兵輪斷
難上駛萬一冒險深入尊處切不可聲明滇軍進扼致與原約調回邊界
字樣相背也至第三款邊界運銷貨物及應在何處添設關卡一時尙難
定議容後再行布商或須委員會勘詳確西國通例凡議約稅則有數年
始就緒者固無傷和好耳法兵在越者雖據稱不遽撤回又有將撤一半
之說望時時確探飛示 廷論紛紜茫無定見但款局已成祇要內外慎
持之執事似須久駐邊關控制一切

五月九日致曾沅甫宮保

幼樵京卿奏設水師衙門請 特派重臣經畫一事昨奉電示此事關係
重大意見必須相同往返函商定妥再行會奏等因具仰老成謀國至意
當經電復大略先是幼樵在總署創發此議恭邸蘭相多踴之遂欲以茲

事委之鄙人實苦才力不及曾於二月十三日詳覆總署請仿東西各國之例在京添設海部或令不才襄助商榷嗣聞樞意不以爲然仍擬奏請在外設水師衙門正繕奏間朝局忽更因而中止幼樵赴閩 召對時又奏奉 懿旨飭陳乃下南北洋先行會議俟覆奏後想仍 勅樞譯會同戶部妥議也各省兵船散漫誠不可無以統壹之但非北洋所能遙制卽南洋兼管閩粵洋面亦恐鞭長莫及若在京設海部又無熟悉情事之人堪膺是任此建置之難各省防餉竭蹶斷難猝集千萬鉅款若如德倭之制分年籌款逐漸添船俟海防少鬆略裁營勇或可勉力爲之兩張及吳陳兩會辦心精力果當願分贊斯役應否由執事及鄙人合力肩承謹鈔與總署往復函及譯德倭創立海部規模述略寄呈鑒核並乞詳晰指示以便敘摺會陳

閏月二十四日復許星叔少司寇

內外局勢屢變皆出人意料之外賴公等持危扶顛幹濟艱鉅弟雖謗滿天下它日或猶得爲山野之幸民也越事已同破甑近復迭起波瀾震動沿海彼慾難匿我餽莫支愈久愈危亟宜設法收束蚊肩綿力其何以堪六月一日致曾沅甫宮保

昨奉電 旨授我公以全權赴滬議約艱鉅之任危急之秋非公不能解此紛難又得伯潛閣學與筱邨康侯會籌襄助千鈞一髮當漸轉圜馳系曷已從前簡約本係止兵草約多罣漏牽混之處物議繁興負疚滋甚不意又有諒山之戰致騰彼口以原約第二款卽行調回邊界爲詞猶可說也然萬國公法遲延有因並非背約至福曾臨行面稱限二十日四十日撤兵語近脅制當已斥駁並無公文照會何足爲據迭經緘致總署並電屬李丹崖與法人再四辨爭彼亦中阻茲將函稿二件鈔呈鈞核該曾謂諒山戰狀我先埋伏動手而潘琴軒來電實係彼先開槍礮迭文胡弁尙

未到津先將三次電語奉覽以爲臨時駁辨證佐

六月六日復張樵野京卿

法事倏定不意又起波瀾巴德諾舊充外部茹費理幕僚初尙欲維持和局奈外部爲孤拔福祿諾等所贊持必動兵以索巨款沅帥此行如略不懇勁難保不卽開兵端馬尾船廠危於累卵幼樵屢電尙盛稱軍威亦不自量之甚矣丹丈憂憤成疾想見謀國苦衷乞假靜養定可全愈執事值此時艱贊襄機要但冀焦頭爛額救熄燎原中外蒙福不淺鴻章以叢謗之身祇有竭力脩備捍禦疆圉若法不添調陸軍北來計可扼其衝突耳煙臺無可防備東力亦不足制之萬一有事恐將據爲糧煤接濟之所遂令南北海道梗阻焦慮莫名總之和局翻一回更壞一回求如前約之粗疏而不可得矣使節瞬指英美亦須法事了結乃無內顧之虞

六月九日復周筱棠京兆

法事變局實出意外初訂簡約因彼慨免兵費乘機速定其餘節目尙待後商幸奉電 旨允行乃畫諾後異議遽起當軸搖惑自有洋務議約以來罕見之事福曾瀕行限期撤兵面加斥駁彼遂自用鉛筆將節略此條刪抹此亦彼族問答常事不必一一上 聞且正值衆謗羣疑卽請亦必大碰迨彼兵逼近復請照約調回仍不准行固知必待責言乃降 明諭中外交涉四十餘年仍蹈道咸朝令夕更覆轍由於舊人少而新政多也此後洋務更不能辦尊意俟此事了期引退鄙人必當肩隨但恐不肯鬆手耳法廷堅索賠卹卽再展限辨論必不空手而回以後洋約亦有籌辦不到之處誠如來示無論辦至何處均屬前功盡棄焦慮曷任獻縣漳沱新河實有裨畿南大局壽蘅於水道原委利害全未攷究專聽四十餘村災民偏論遽爲定案所擬添開八里橋引河六十餘里工大款巨而無甚利益子牙另開引河入海卻係老生常談但需百萬帑金民情地勢亦未

盡順或俟彼任直督有此大力耳裁五經手各工須來春補完一時似難
遠調容爲留意

十二月六日復吳清卿副憲

此案皆爲朝事而起而日本初與朝鮮訂約時卽明認朝爲自主之國隱
然不認朝爲我屬邦井上未行之先固請我華 派全權便宜行事大臣
卽是狡計若謂就此互議證明朝鮮自主也其意尙不僅在撤防營一節
果派全權適中其計事更難辦今我處若卽若離之交但使朝日議定則
本案已結當不至另生波瀾二十三日執事闕然入會微示以干預之意
極得機勢井上竟飄然而返不一枉顧殊屬可恨頃將初四日 寄諭及
是日總署來函節錄大略電由旅順袁道專船呈覽聞有奏摺迭檄關轉
遞守候 批同是否係請 旨回渡總署所屬朝王具表申謝及贈卹傷
亡官兵二節本題中應有之義卹銀自可寬免或將死事者奏請附祀吳

被軒朝鮮專祠並爲出力將士請獎方覺周到乞酌行之金玉均逃日井上雖允協擊未肯載明約內照公法則必不掣交如俄之庇匿白彥虎是也徐相兩穆麟德到日後恐其不敢啓齒未知朝王能另設法否死灰復然殊堪塵慮至吳兆有等營久戍異域苦累可憐此時不便遽撤須俟事局大定再議換防該員弁等驚弓之鳥若台駕過歸失所依倚方正祥一營及丁兩亭三船不得不暫時留駐明春察酌法事若有變動再行調回尊意以爲何如王妃尙在然閔氏權勢已去若令大院君東旋能否於時局有裨該國君臣闇弱經兩次變亂不小是否有懲毖振奮之思望察酌代籌如大院回國不至另生他變且能密贊大計或令袁世凱密謁國王專疏籲懇當蒙 朝廷鑒允耳

三月五日致徐孫麒麟星使

光緒十一年

伊藤大使在津兩旬會議七次始將條約訂妥畫押我軍久戍朝鮮本無

永遠不撤之理但日本因我未撤彼亦不敢遽撤積疑生衅轉成贅疣茲
議彼此同撤或先或後決無食言至朝鮮去冬十月之變咎在竹添其後
我將士亦有唐突伊藤云倭民被我軍戕害七人尙無的確證據尤爲戒
飭營官查明兇手懲辦藉以了案亦持平之道茲將專條及照會稿鈔呈
台覽俾與彼邦人士談論得有依據伊藤瀕行謂回國後卽另派妥員爲
駐朝公使是亦內悔竹添之生事矣伊雖甚要好暫未議及球案緣議而
未得辦法彼既久駐豈肯遽退若彼此半分亦非長局伊欲鄙人奉 特
派赴倭便可相讓法事未了礙難分身伊藤治國才猷精敏如銀行鐵路
章程望時與探討詳示爲盼

五月四日復許竹筠欽使

數月來倭法議約應接不暇晉問罕通奉三月初八日手書敬審一一申
報謂執事近有黃門之戚果爾尙祈善自排遣丹崖抵港爲香帥邀往粵

省諮訪軍實日內計可北來移交各件數乞費心料理三艦電催開駛雇人購物頭緒甚繁昨接三十電五月下旬開駛途用找價各費一接電音必當陸續匯寄約計七月間可抵津沽此間接帶及教練之員尙未選定式百齡雖曾在德管駕小船實非學堂出身來津數月閭廠管帶員弁皆有後言若照約委帶儘遠未卜能否得力丹崖誤聽人言妄加推許卽所雇各德弁亦不盡有真實本領但尙可節取不似式百齡之夜郎自大耳包烈現充武備學堂教習性情間有出入兵法頗知根柢前爲家用未全付欲薪興訟譯員調處預借薪銀了事其在德溢支之銀自應算抵也肄業各生船政既議展留至本年夏秋極當照辦幼樵前請辭去日意格彼願不領薪水始終其事尙有悃忱左相與裴樾岑復齋三屆出洋不日會奏擬請由英法出使大臣總理其事劾侯卽須替回尊意是否仍令日酋經理容請電示遵照德商定購造藥新器乞派妥員驗收法約已定以後

通商劃界各事口舌尙多譯示西事望隨時鈔寄

五月二十八日致總辦朝鮮通商事務陳荻南觀察

前爲朝俄密約事專函交英兵船帶往久未得復正深懸系昨又令劉薌林密寄兩電交海鏡資遞計均達覽連日據日本榎本公使英領事函稱朝鮮外務已照會各國以英踞巨文島一事請各國公評相助俄參贊在朝要挾欲索占一島各等情英據巨文島一時必不肯退俄又藉端生心況若有朝俄密約予以口實此事大費調停想朝臣必不敢遽許出租致啓俄日爭端前電不過徇英使之請姑爲代陳亦明知其不可行幸屬朝政府祕而勿宣爲要至朝俄果有密約先既未派全權後亦未經批准按照公法應作廢紙俄卽狡狠儘可據理堅持日本外務聞此事甚爲鼓譟昨與榎本密商令其轉達將來事變正未可知穆麟德罷斥後是否尙豫聞機事目下若何情形望確探詳示日本允同時全撤弁兵已否撤盡並

示及漢城至釜山陸路五日可達各國有要事皆由釜山電局轉遞獨中國無一電報嗣後遇有重大機密要件應卽專足送釜山轉電查照商局電報新編用詩韻上下平爲一月按日照加字數每電以韻字冠首便知英兵船常往來仁川煙臺要函亦可託其轉寄金允植仍管統理事務否金宏集現作何官政府何人主持希一一詳報

八月九日致日本參議伊藤春畝

承惠各書冊因繙譯未齊未及細閱中華士大夫拘牽舊制欲求仿效一二而勢難遽成良可愧歎惟軍實舟師擬逐漸整練以圖自立此尙能自我爲政者也英人有謂橫濱銀行近有虧折疑其所言不實此事中土必須仿辦但慮立法不精籌款不足致有虛耗印刷局製品件件精巧歲需工本幾何獲利若干稷本公使過談欲知其詳茲有土物數事屬其帶呈察收聊寫區區之忱

九月二十九日復崧鎮青漕帥

臨清至阿城建造鐵路運漕一節兄在京時適有延京卿茂條陳漕務請於黃水穿運處脩壩建閘奉 懿旨飭與王大臣等一併會議稔知壩閘均無把握因將盛道鐵路接運說帖進呈 聖意及醇邸深以爲然故飭尊處與成陳二帥查勘定議將來果能興辦兄自應力爲主持派杏蓀督籌辦理部存洋款除購船外無二百萬之多可由外設法另借至各省運四十萬石似不可少蘇甯三十萬當能如數浙江無折色恐難遵籌湖廣江西能湊足否若無四十萬鐵路必虧本息是須先定米數及每石給路費三錢乃可議造鐵道倉廩須在路旁臨清舊廩斷難合用似須在估費二百萬內核辦無庸另籌由臨至通船隻東省必難獨任須直東合力籌雇天津制船尙可勻濟此尙小節目也 寄諭中河水漫溢恐有沖決妨礙係孫萊山侍郎過慮告以洋匠節略言明近河處築基六尺未有漫水

能至六尺以上者第恐屬臣少見多怪以輿情不順阻之其實此小鐵路能與南北運貨必旺地方必有起色尙祈大才通籌全局贊成斯舉亦百世之利也克齋何日北來如有成議當派西洋妥幹監工再往覆估

十月五日復曾沅甫宮保

鴻章在京勾留兩旬 召對五次敷陳時事愧無仰贊 高深與當軸意見不能盡合大抵 禧聖與醇邸銳意圖政欲力變從前嬖倖虛飾之習而諸臣墨守舊規似不足振興亦不敢有所建白各省裁營局節餉贍京旗一節爲固本起見鄙意一時必辦不到 宸謨邸意必欲見惠於旗兵又不深悉外省拮据情形丹相則云自左公善將軍兩次帶隨員來神機營邸知薪貲太優謂各省浪費如此京旗匱乏如彼不可不省有餘以補不足鄙言公特優待內相非盡人逐事皆然卽樽節絲毫亦何能集得巨款丹云亦明知之力爭之不敢不附會以成斯議且觀各省覆奏如何耳

卽此一端可知體察時艱之非易矣海軍一事條陳極多皆以事權歸一爲主鴻章事煩力憊屢辭不獲雖得兩邸主持而仍不名一錢不得一將茫茫大海望洋悚懼吾丈何以教之至台端靜鎮江左措置周詳樞堂尙無異詞新勇裁汰若何餉力能較寬裕至以爲念

十月二十五日復崧鎮青漕帥

陶城埠至阿城河身十八里填實築高建路卽以東隄爲鐵路座身似尙直捷臨黃堅築碼頭工程必大惟慮淤沙太深根柢不堅未能經久黃流變遷無定亦須隨時遷移應俟王道查勘議覆再由台端咨覆會奏請飭委員帶同洋匠覆勘定議始可興辦將來覆勘祇須敝處遴派員匠前往與東省印委酌議可耳至鐵路準造後除江南北漕數外如有不足另請湖廣江西湊集成數屆時由執事斟酌挈銜會奏似又在後著矣

十一月十二日復張朗齋中丞

知旌節卽將東指先移行隊暫紮琉璃河嚴寒地凍似不便築壘或於巨鎮大店分屯來春再圖進援台旆先赴東查勘黃河疏濬機宜至煙臺久未布防法事起後當事僅於山後添營子健往勘亦祇敷衍其說事定營裁更無過而問者將來如何酌辦似應預籌大略俟履新後事權專屬始可次第布置惟東庫竭蹶日甚各省協撥爲難卽論河工非有巨款莫辦農部能否應手耶稔知東省熟悉河務以潘邵卿爲最昨汪柳門過談亟稱其能似宜 奏調隨往周歷履勘足資商榷

十二月九日復曾劄剛襲侯

阿摩士莊製造船礮著名英國通行快船祇有穹甲而無水線及礮臺甲鴻章夙所稔知中國向無鐵甲船僅購定遠鎮遠二艦丹崖習聞德海部士叨取議論快船蚊船皆以加申爲妥故酌定濟遠之式又限於船身過小不能處處合宜遂叢衆謗及抵北洋試駛尙屬平穩雖不過速而較定

鎮及前在阿廠定造之超勇揚威快船已過之無不及究竟多一礮臺並
艙口立甲亦可冒充鐵艦也尊論英以穹甲爲主與德製提出穹甲中段
傳之於外以爲水線帶者得力亦異不能強之合一洵爲圓通無滯海軍
甫設不妨並存其式他日駛行既久利病自見再專擇其一推廣仿造可
也驗工料閩生比已到否學業未精須人督率謝先任王世綬等如能考
究精核或令督同監驗阿廠素願公正然各國造船無不派監工料實慮
匠役之偷減礮由克虜伯製架由阿製當不致齟齬不合鑄銅魚雷係德
專家似應由竹筠一手經辦芝田於此事向未究心專賴規畫定局渠當
循辦尊體近復何如明春旋旆譯署及海軍署均待贊襄主持艱鉅非異
人任也越事稍定通商勘界二端正在相持不決而緬事又起屢見電商
譯署能識其大 中朝驚貢獻虛名分有巴磨新街之說恐滇帥無此造
制魄力耳西藏通商 朝議甚不謂然英慾無厭若能嚴立禁約似無不

可朝鮮巨文島久踞不退俄人嘖有煩言謂華不催英退彼必分割朝鮮
他處公能力爭否韓政闇弱與越緬等尤東方根本之患外侮日增兵餉
日絀人才日稀雖有狠心辣手亦有行不去之時可爲浩歎鴻章精力衰
憊無能爲役責望過重進退趙趙亟望旌節東歸抵掌痛談藉匡不逮

十二月十三日復丁稚璜宮保

年來軍事洋務蝟集卒卒無須臾暇久關箋候頃奉九月二十七日惠書
將有遂初之志竊念時事多艱西陲一隅全賴大才撐拄 聖明倚重老
成必不允行尙祈爲 國愛身永肩鉅任以慰中外之望法事搶攘年餘
幸已确定滇粵勘界通商現正分投籌議不至再起波瀾惟英人突攻緬
甸踞有阿瓦又將議由騰越大理通商並有入藏游歷之舉滇中固應接
不暇三數年後西川必將波及實恃公爲萬里長城也朝鮮政昏民弱俄
倭眈覷其旁危如累卵尤爲根本切近之憂昨奉 命穆將軍赴東省練

兵未必卽有實濟與法用兵未及一年洋債山積庫帑空虛農部銳意裁勇固無如何又慮伏莽四起內患與外侮迭乘更不知所以爲計耳鴻章力孱任重惟日兢兢近來精力大不如前而不敢乞退坐待顛蹶公其何以教之

正月十六日復曾劄剛襲侯

光緒十二年

海軍之役同舟共濟藉資贊襄鄙人方幸卸肩有期執事乃欲稱病避事受恩深重祇可鞠躬盡瘁徐圖幹濟時艱耳法事平後各省須還洋債近二千萬海軍無可恃之餉尙未能多購巨艦將材尤乏欲仿英制萬分之什伯一時實辦不到甚盼及時探訪西國水師兵制以備它日逐漸振興公其有意乎印督銳意拓疆未必仍允朝貢卽分界入幕亦慮尙費唇舌滇粵邊患固無已時俄人覬覦朝鮮尤屬切近之災四方多故不務強兵變法而徒空言攘夷效未見而害已叢集矣

五月十二日復曾劄剛襲侯

前接四月九日來電細閱英德局廠又赴黑海辭俄主須秋初乃能起程
回華當經電復嗣隨邸來津出海巡閱談次述及並未催促早來必可追
過盛暑於尊體調攝尤宜此當乘暇游歷各廠見聞日增回 朝握晤計
在中秋節後矣翹盼莫名承鈔示緬事往來各電聆悉一一每與英使詢
及僉云存祀萬辦不到進獻中國亦不肯仍稱貢字 上意擬俟執事旋
京詳商辦法近日歐署使交卸之前曾向譯署稱已立教王不令管事與
緬祀無干署置不論似英亦不著急聞緬邊土司蠢動英復添兵進剿或
俟此事辦竣再議善後睦鄰之方耶快船勝鐵艦英法多持此說西海水
深鐵艦得力亞洲海口淤淺鐵艦過大實不相宜然快船喫水過深者亦
多不能進口似三四等快船行十七八海里能載魚雷戰巡皆便阿廠能
包訂燐銅魚雷價不見增洵爲兩便芝田接辦自可循照無誤方兒於泰

西文語粗通究未辦過交涉既經芝田 奏調報罷後應令西行藉增歷練晉謁時務祈切實訓誨

五月二十日復曾劄剛襲侯

展誦手示在五月中下旬起程似與前電意緩至秋初少異紅海一帶六七月炎風烈日熱不可耐洵於尊體調養瀦眷細弱不甚相宜惟聞靜臥數日便可平順過去吉人天相轉頌曷任造船合同既繕成冊是否能繕印數分咨送芝田於此事素未考核依據定章知無差誤竹筴昨商派員弁水手分赴英德駕駛回華自係正辦第此項人才必須由學堂出身少有歷練方敢畀以帶船出洋重任現船管駕正不敷用焉得大隊可遣恐須仍由該廠雇人包送臨時派數員隨同學習照料卓見以爲何如餉項竭蹶異常一時亦難添置執事蒞滬後想須繞道金陵再行北上

五月二十二日復醇邸

鈔寄接見各國公使四條準情酌理折衷至當可勝欽佩聞巴使正在糾
邀各國遵行設再以迎送客拜等節相詢總署但援各國使初見親王通
例折之彼自無詞望力持定見稍振 朝綱爲幸英新使華爾身過津談
及深願與茲盛會昨法領事林椿云戈使甫去署使未來願電促其北上
隨衆進謁而以望塵不及爲慮亦可知以得見爲榮別無議論矣教堂擬
給空地樊教士求較舊基爲多既無房屋似亦無甚顧惜教約翰續信謂
教皇查案京城南北東西四堂基皆 先帝賞給教皇之物彼可自主情
願將北堂移換德璫琳又電致敦轉商能略減價更見忠順容俟電覆奉
聞教皇與各國主平等嗣後如賴有國書誠如鈞諭宜以 國書報之俾
示聯絡中土交涉之案教務最爲隱患教皇權令能行教士必不敢無理
取鬧則裨益遠矣

七月二十日復吳薇隱觀察

尊意閩廠經費不足各省應添船隻悉令代製洵屬一舉兩得惟北洋籌款之艱執事在津時實所親見今協款全提海署較往歲更形拮据前在英德訂造四艘乃上年神機營所借洋債餘款頃核計船價尙短百餘萬正在設法搜羅豈能更有餘力添製多船耶姑就寄示快船圖飭法監工福禮士核閱據呈說帖似有未盡精密之處照鈔附覽英德續訂之船速率雖不甚多而一則有水線帶鋼甲及鐵甲堡一則有穹甲保護船機尙可海戰此則速率既少載煤無幾如果定造須待妥酌雷艇三式估價與西洋略等惟摺內稱須添機爐製多艘方爲合算亦慮不能剋期應手耳九月二十二日復徐孫麒星使

長崎兵捕互鬪一案盡畫周詳欽佩無似担文去已兩月證供尙未齊齊是否日人有意稽延令我多出訟師之費抑担文藉詞多拖時日多得薪資想執事必屬參贊理事等加緊催辦也日來豫籌此案結局之法適有

委員伍廷芳精習西律久在香港英刑司處辦案令其條列以對深合機
宜照鈔呈閱委員會審後如能在崎嶇結固佳否則須如伊藤井上等原
議由執事在東京先與井上會商再向伊藤剖論如仍狡執駐京鹽田必
係一鼻孔出氣卽總署暨鴻章與之商辦恐亦無益似可與外務言明照
西法通例公請友邦公正大員評斷調處諒彼無可推辭英臬司連呢人
極公允昨屬英領事轉商英使似無不可日廷若不允服彼亦可另請一
員或再由該二人公請一人評斷則事無不諧矣會審如誦在我死傷過
多無再賠銀之理卽可漸漸拖宕不必費如許波瀾層折總之以速審速
辦爲妙担文等審畢應卽辭回英使及總稅司等皆謂先須兩國自商辦
不應延他國訟師小題大做也